

Oxutta s'axetwani

Mukhalelo wa Etiini



Kaatthuna kisuwele akavi answela esipo ela yaamukhaani, kookhomasakani ni opatthana voohakalalaxa w'Ekristu ni mphento wa Kristu olelo, akavi answela esipo ela yaamukhaani, “Owo Onnookhapelelani”? Munnisuwela? Vaareera, nrowe noone sinto ninoowerya wiipa. Munnisuwela, munna? Munnisuwela? Vano:

Owo onnookhapelelani,
Owo onnookhapelelani;
Ni nsuwa wala muuttutthi,
Owo onnookhapelelani.

Oh, ti yooreera. Nrowe neehererye-tho vano.

Owo onnookhapelelani,
Owo onnookhapelelani;
Ni nsuwa wala muuttutthi,
Owo onnookhapelelani.

[Nipuro vahiitthu mufiitani—Mol.]

² Tith'ihu a Wirimu, hiyo ninnooxukhuruni okhala wira Nyuwo munninikhapelela ni muhooniherya mphento Anyu wa hiyo, mpakha Nyuwo omuruma Mwan'Inyu Yenyu oophentiwa, wira... Mwaana a Muluku oohittheke, wira okhale nipuro n'anatampi oottheke. Moota onooxukhuru-ahuni Nyuwo, mwaha woonikhapelela ni onuupuwela, mwaha wo wira yeela! Ni khanireere oxukhuru, Pwiya. Nootteeliwa murima mwaha w'othukumana va xekuw'ola, vathi va ekhuneelo ya wirimu, ni ninoovekelani iparakhha Sanyu vasulu va mutek'ola. Munivahe, Pwiya, wira khula mulopwana, muthiyana, mmiravo wala mwaaruusi va, esome voowiixerya vano mwa Soolempwa. Hiyo nri ohooolo w'olumwenku oneettiheriwa ni Satana. Nto, Tithi, hiyo ninnivekela, okathi onsom'ahu ikuru s'axetwani ni etthu awo aniwiirih'aya atthu, Nyuwo munivahe waamini wuulupale, ni wira ithoonyeryo ni mitikiniho suulupale sipakiwe. Vano, hiyo ninvekela mwa Nsina na Kristu ni wa ovuwa wa Muluku. Amen.

³ Hiyo nri, musomelo oxekuw'ola, naanaanoru ninookela mwa yeeyo, woona waka, minuutu soophiyaka muloko ni mithanu voohipisa. Nlelo mwaha wa *Oxutta s'axetwani*.

⁴ Nto vano kinoomalaru waakhela muhupi, okathi vakhani ovinre; Munna Beeler, w'apatthani aka. Ni kimpacerya wAfrika, eriyari ya Julho. Tivo eyo ennimaliha mwaha, nookhala

yoothokihwiwa vano. Nto Munna Baxter khokhanle orowa okathi uwo, vano kihaana orowa wAfrika meekh'aka. Vano orowa wu ni...wira...Nyuwo muhaana okivekelela vano, wira Apwiya ekikhaliherye, 'okhala wira vekeekhai kinoorowa otthuna yaawo vano, weiwo eriyari ya...kinnaawehererya atthu oophiyeryaka ikonto imiya piili vamuthukumanoni vale.

⁵ Ni kookhalana yoowoona elempwe va. Kintthuna wira nyuwo mphwanyerye muraarelo wa yeeyo. Yiiraneiyee mweeri wa Dezembro. Miyo kaari onrumpwa voosiisu umosa okathi Nlaikha n'Apwiya naakenly'aya. Miyo...Moone, okathi waary'aka weiwo, kaarohimwiiwelela Muluku, vano kumphwanya amiipa. Khula mutthu onnimusuwela—onnimusuwela ole okhanle amiipa, mwaaxiitthu mmosa onkela...onihalela omwiiwa mutthu. Ni mwaha wo wira kaarimwiira etthu Muluku akihimenry'awe wira kihire. Akavi yiiwale ehantisi ene yeeyo? Kinoona wira amosamosa wa nyuwo muri va. Koosuwela wira atthu yaattamenle etapernakulu ahiiwa ehantisi y'etthu yaakhumelenle. Muluku aakihimenrye orowa nipuro nimos, n'ukhala ottaiwene wa nipuro *nla*, ni wira kitthikele nipuro nikina. Nto miyo khwaahiya alaleyi okikupaliha. Vano, alaleyi t'oreera murima, ni awo axinn'aka, masi muniwelela ele Muluku onooleel'aweni. Ti yeeyo. Munnona? Nyuwo munikhalana muteko.

⁶ Akavi anuupuwela emaara emosa yaakhanly'aya maprofeta anli mBibiliani? Nto mmosa aya, Apwiya yaahimuhimeerya, khwira, "Murowe nipuro *khata*. Ni muhi—muhirwe va... Mutthike ephiro ekina," ni siiso. Ni—ni khwira, "Muhilye wala muhiwurye mury'ene weiwo."

⁷ Nto profeta mukina eekeekhai khimukumanana, khwira, "Apwiya aakumana ni miyo nuumala Awo okumana ni nyuwo." Ni khwira, "Muvire owannyaka." Vano profeta khwiiwelela etthu mukina aahimaly'awe, khumpweteya ekumi awe mwaha wa yeeyo. Moone, nyuwo mwiireke ele Muluku onoohimeery'aweni wira mwiire voohicala etthu mutthu mukina onihimy'awe.

⁸ Vano hiyo nri...Mwa yoowoona ela, Owo...Eyo yaahikivenxa, muloko ni mararu a Setem...ahiiso a Dezembro. Ni—ni kikilanthene-ene mpararini mwa olilia aka, kaaniikoha exeeni yaarowa okhala mahiku aka oohoolo. Miyo... Vahokolowenly'aka nno, kaatthuna opwehiwa oxipiritaali w'ovalaanhihiwa, axiitthu yaahalela okikuxa miyo othene. Vano khumwaleiwa mw'erutthuni okathi ophin'ye aka elapo ela. Nto, ni mahala a Muluku, kaahihiiwa orowa owaani, okhala wira ti yoorikarika saana. Vano miyo khuvekela, khurowa w'alaleyi ale, miyo khwira, "Apwiya akihimenrye wira kihirowe epantt'ile."

Khwira, "Oh, Muluku onnilavula n'atthu woohiyani nyuwo."

9 Miyo khwira, “Kore aahikhalana muupuwelo yoowo em meta.” Vano nto, masi miyo khurowa khukuxa mataakhuru khuhela vasulu va manawo aya, nto miyo khwira, “Muupuwele, mwa Nsina n’Apwiya, neetta-ru mukwah’owo nirowaka iwe, onoorowa okhala woovonyeya, ni hiyo othene ninooliva mwaha wa yoowo.” Nto naahiliva pahi! Oh, wulu! Hiyo othene naakhala ntoko naarowa okhwa. Vano nto nitthikaka . . .

10 Siniwananiwa itthu sinci-ene ilapo iye sookhopela. Mwa nlikanyiho, ethotomwa yaamukhaani enoolumani, enimoophwanyihani ettekuxa y’etteette. Nto etthu iyo yaamukhaani, yoolumani vale, moonaru oneena, muhisune. Nwehe, akhala-ru mwaaxiitthu mukhaani, muhimukumihe. Orina muru mwaamukhaani, owo onookela vasapalani, khwiirukunxa so ni wiitikitherya. Mwamukumiha-ru, mwammukumiha muru ohale vaavo. Ookhalana mwaaxiitthu mwa yoowo, aamurowa woorakalihani. Tivo owo . . . Muhimusune, wala muhimukumihe; mukuxe paahi makhura vakhani. N’uwo ommumula n’ittuli. Mmuyeeherye makhura, nto owo onookhuma.

11 Vano yookhala epwilimwithi yaamukhaani. Eyo khennyakula hata vakhani. Eyo enrwa n’ittheke. [Munna Branham ommana ntata nawe vakhani—Mol.] Eyo enimookwanyani paahi, ti yeeyo tu, moophwanya ettekuxa.

12 Vano—vano nto yookhala ele eniihaniwa enowa mampa. Eyo yoolumani vale, munkhala minuutu miili paahi nuumala woolumani.

13 Ni nookhala nikalattapo na ncano. Munikhala minuutu soophiyaka muloko ni mithanu nuumala oluma. Nto emosa aya yaahimwaattamela mwan’aka saana, vaahal’awe okwanyani ni ntata muru aya. Yoolikane-ene, wira emulume, nihinatthi omoopa, siiso.

14 Ni nookhala nikalattapo nooriipa. Oh, sookhala-wo itthu sothene! Vano nto woopiha wa inama sa mutakhwani, vekeekhai, akharamu, anamatthavi, wala ahavara, ni sothene sikina soowana-no, mutakhwani. Vano nto iretta, sookhala inamuna sothene sa iretta wu.

15 Nto muhaana sothene iyo wira mukumanane okathi onrow’anyu. Ohiya yeeyo, vano ookhala mukhwiri wira ootharimuleni mwa khula enamuna, moone, okhwiri aya wothene ni itthu. Masi, moota, etthu xeeni yooreerexa owoona Apwiya’ahu okakha seiyo, epantte t’ipantte, siiso, vano n’ukelela ohoolo.

Nto nihiku nle kinnuupuwela, keemenle-ene vale, saana, etthu yaakhumelenle, kinimooleelani okathi uwo muthukumano mukina, ’okhala wira kinthuna kikelele mwah’aka oxekuw’ola, wa *Oxutta s’axetwani*.

16 Masi vano, ni miyo kuupuwela ela, kikilanthé-ene vaavale, exeeni enrowa okhala emalelo? Nto kitthikaka kilapuwaka ephareya, koosuwela wira naahikhalana orukunxa murima w'atthu oophiyaka ikonto emiya niry'ene weiwo. Nto Munna Bosworth mutokweene khukirweela. Khwira, miyo khwira, "Ahe, Munna Bosworth?"

17 Owo khwira, "Miyo kinniisinnuwaha mwaha wa nyuwo, Munna Branham!" Owo khwira, "Nyuwo muri paahi—muri paahi woopaceryani w'ekumi," nto owo khwira.

18 Miyo khwira, "Ahe, kinoona wira sothene soomala." Miyo khwira, "Kooviriha iyaakha miloko mixexe. Kinoona wira koowana ekhotto yoooreera ni koomaliha muteko."

19 Owo khwira, "Mooviriha iyaakha miloko mixexe?" Khwira, "Miyo kaarina munnuwelo yoowo kihinatthi orukunxa murima." Khwira, "Nlelo kinnoona saana." Owo aahala vakhani ophiya miloko mithanu na miraru. Nto pahi . . .

 Miyo khuupuwela, "Ahe, khino ti yeeyo."

20 Tivo owo khwira, "Nnari, nyuwo mwa Branham musya vano. Munnisuwela moota wo weettiherya mithukumano sanyu oratteene, n'itthu sothene." Khwira, "Mwahala-ru omukuxa Amerika mwa enamuna yoooreera, ni muthukumano wootthokihwiwa oratteene, vakhanly'anyu okhalaka isumana thanu na mosa wala thanu na tthaaru nipuro nimos, khutthokiha ni khulaleerya," khwira, "mwaamwiira etthu, masi, ni y'Apwiya ahu." Vano hiyo khutthikela, siiso paahi, tivo yaari yoo—yoooreera saana.

21 Vano okathi vakhani, miyo khoona yoowoona, okathi waary'aka wAmerika, nto eyo khukirweela, khukihokoloxerya wAfrika, vano khukooniha muthukumano yoowo ene, waaphwanyaneya iwe ohoolo wa oDurban. Nto muthukumano woopacerya khulakaseya khukhala ehantisi, orowaka Onkela nsuwa. Muthukumano wa nenli khupacerya ni, vapaceny'aya, waari muulupalexa ovikana muthukumano woopacerya. Nto Awo . . . Miyo khwiiwa okhuwela, nto Nlaikha nimos naarwa nikhumaka Wirimu; Nlo naahikhalana waarya wuulupale.

22 Vano Nlaikha n'Apwiya nenlo ninkhala vakhiviru ni hiyo va, neemen- . . . kweekwe ninkhala moonoo aka woopwana, epantte *ela* nno. Nto Nlo neemenle vaavale, ni Nlo naari—Nlo naamweetta nirukureryaka. Vano kaahimoon Mutthu ula eemenle vathi Vawe. Owo—Owo kahiyo . . . Vano, eyo kahi yoowoona mwaamoonaka. T'ekeekhaixa ntoko munikiweh'anyu. Vano, vanniweryaneya omwiiwa Owo eettaka ni alavulaka ni nyuwo. Nto okathi Owo . . . Etthu p'itthu, ti y'ekeekhaixa. Ni kahi yoowoona; Mutthu uwo omphwanyaneya vale siiso ntoko siry'anyu. Ni nsu Nawe nri siisa ntoko nawaka naarow'aya okhala wala nawinyu naarow'aya okhala. Masi

yoowoona, etthu enoorwa ohoole wanyu vano nyuwo khunoona, siiso. Masi Mutth'ula onookhuveela paahi khukhala vo.

²³ Vano Owo khukileela etthu... etthu yaarowa okhumelela. Nto Owo khwira wira e... Nlaikha nla khukhuruwa, khukiirela wira kirukunuwe kiwehe epantt'ila. Nto yaaweha epante y'oHintiya, vano. Nkinihimya wira oHintiya, masi ti vookhuveela. Masi awo yaari atthu aHinti.

²⁴ Okhala wira, atthu a wAfrika t'erutthu, oorilela, ntoko atthu ooneneva. Akina w'awo arina imeeturu piili ni isentiimeturu muloko orakama waya, ni anrilela, oh, ikhiilu emiya emosa ni miloko miili ni thanu, emiya emosa ni miloko miraru ni thanu na mosa, eerutthu. aZulu, vano, aXunkwi ni aBasuutu, ni, oh, aakhala mahimo manci-ene oohiyana-hiyana. Yaahikhala mahimo muloko ni mathanu oohiyana-hiyana yaaphwanyaneya ekilanthi-ene vaavale nihiku nle, miyo kaalavul'aka-no.

²⁵ Kaamuhimya nuulumo nimos, ntoko, "Yesu Kristu, Mwaana a Muluku." Kaamurowa owurya maasi nihinatthi ovira mw'alipa-ootaphulela othene. Mmosa aamwiira... Ni onyakula wothene!

Miyo kaanuupuwela, okathi waawiiwaly'aka atthu aPentekosite elavulaka ilavulelo, wira khino mmosa alavulaka mwa muthinto mmosa wa nsu nto mmosa alavulaka mukina, vaaweryaneya sayi okhala yeeyo? Masi kinnaamini wira Bibilia ookhalana exariya, ni koosuwela wira ookhanala, okathi Owo ohimaly'awe, "Khanivo hata nsu nimos nihinihimya etthu." Ti yeeyo.

Akina aya yiira, mmosa aamwiira, "Blrr, blrr blrr blrr," yaahimya wira "Yesu Kristu, Mwaana a Muluku." Mukina aamwiira, "Klak klak klak klak," yaari "Yesu Kristu, Mwaana a Muluku," ni nntaava nawe. Tivo hata wira muthinto xeeni wa nsu, ninnihimya etthu nipuro nlo. Ti yeeyo. Hata wira muthinto xeeni wa onyakula, onnihimya etthu wa mutthu nipuro nlo. Nto okathi Nlo naary'aya... Awo yaanivahererya yeeyo.

²⁶ Vano miyo kaahiweha wira moonoo aka woohiyana, okathi Nlaikha nlo nikhurunw'aya nto miyo khoona ntoko muttitthi iwe, n'awo yaari atthu ni... yaakhala ntoko yaarina mu— mukhumi mwa yaawo, sa, ni waari wooputaputeliwa ni woottthukiwa, ntoko mwa mwaana mwaamukhaani, nntapwatta. Ni aari yoowo. Ni kaaniwerya woona mpakha vaawery'aka woona, yaari atthu paahi. Vano nto Nlaikha nla khupattiha muthuko muulupale woottikinyeya, nto khupacerya weettiherya nno ni nno, *siiso*. Nto nkinatoko owoona atthu anci-ene kookhalaru!

²⁷ Vano nto Nlaikha nla nikina khukirweela vakhiviruxa, nto Nlo khwira, "Aakhala ikonto imiya tthaaru vamuthukumanoni." Ni miyo kookhalana yoolempwe-ene va. Ni nyuwo moolepa va muthinto mmosa w'epaphelo, ntoko sihimaly'aka sa

mwanamwane mwamulopwana aahihimuxiwe oFilantiya. Moolepa eyo vanikukhuni noopacerya na Bibilia anyu wala nipuro nlo, wira vamuthukumanoni va (Onoorowa okhala muthukumano. Ni nyuwo munoorowa wiiwa mwa enamuna emosa.) y'atthu imiya tthaaru okhala vamuthukumanoni vaavo. Vano, moone sinto kahi yoolikana. Owo onrowa okhala wo wunnuwa imaara tthaaru ovikana mukina. Munnona? Athu ikonto imiya tthaaru ary'ene vamuthukumanoni. Nto miyo nkireere otteeliwa murima okhala oorowa weiwo, nkinsuwela yo wira, maana okisivela oroiha minepa s'atthu w'Apwiy'ahu.

²⁸ Nto weiwo, emaara emosa, owoona—owoona apakawu ikonto miloko miraru ntoko siyariw'aya orwa wa Yesu Kristu mwa wihana omosa waltaari, apakawu ikonto miloko miraru ntoko siyariw'aya.

²⁹ Vano nrowe nikelele mwah'ahu voowaakuva. Nsana naahisoma iyiirelo s'axetwani. Kaamuupuwela olelo, moota Muluku oniir'awe. Khamunsuwela otaphuwa xeeni okhanly'aya okhuma. Vano, nkihiyo musomiha. Miyo nkireere okhala ottaiwene w'okhala na—nammooniherya Bibilia. Ni miyo ka... Osoma waka ti wooyeva mpakha ekalaase ya neethanu na piili. Tivo e... Ni, eyo, miyo kikhumme oxikola iyaakha miloko miili sivinre, vano okathi munci-ene ota. Ni nkisomme vanci-ene, masi sothene sinsuwel'aka t'ile enaakhel'aka ni muupuxeryo. Nto muupuxeryo owo waahilikaneke ni Bibilia, weso ti woovonyeya. Munnona? Ohaana okhala Bibilia. Hata wira muupuxeryo xeeni, ohaana orwa... *Va* ori mulipiheryo wa Muluku. Khuuvo mulipiheryo mukina oheliwe woohikhala Yoola. Nto ele ekhanle Yoola, ele enihimy'aka yakhala yoovirikana ni Yoola, moolumo aka ekhale oowootha, okhala wira Ela ti Ekeekhai. Munnona? Munnona? Nlaikha noohimeeryani etthu yaarowa ovirikana ni Yoola, Paulo ohimye wira, "Nitakhaliwe," hata nlaikha na Waarya. Vano, sookhala itthu sinci-ene suulupale. Miyo paahi... paahi... Koothanla mahiku manli, 'mwaha wo waahimeerya mwah'ola atthu, waari nsana ni olelo, sa mithukumano s'oxekuwa.

³⁰ Vano, etthu kiireny'aka yeela, wiivaha yoomi mwehereryo mwaamukhaani wira koone sinto Muluku aamukikhaliherya. Yookhala etthu vamurimani vaka. Nto eyo ti, wira, nuumala Mutthak'ola muulupale, ni Muluku Mwaneene nuumala olipiherya wira ehimaly'aka Ekeekhai, mwa Masu Awe; ni Masu Awe, toko, vano nto ni ithoonyeryo ni mitikiniho. Vano, kinoona wira, ni Ekeekhai ya Ehapari yooreera wa Ekereja, kihaana, wa Muluku, oruuhela yeela Ekereja. Ti yeeyo. Khureere okhala okawayeya, mwa mitthenkeso sinci-ene soovirikana ni ipantte sa maloko sa yeeyo, mpakha okhala yoohiloka. Hiyo othene n'ana a Muluku okathi oniyariw'ahu vasya, Yeeyo, moone. Nto ekeekhai ti wira Muluku onthuna wira hiyo nisuwele yeeyo, wira hiyo n'ana Awe.

³¹ Vano, muupuwele, empa ya Salomoni yaathikilasiwe, olumwenku wothene. Nto va naarwa nluku nookottoopa *sa*, ni nluku nimosa nookottoopa *saale*, ni nimosa noothikiliwa *sa*, nimosa noothikiliwa *saale*, masi, vaheliw'aya vamosa, khiwaakhanle oruma wa sarothi, nnakhala oruma wa enyutto, sothene saahikhala nipuro naya oratteene. Muluku t'ari Namaxuttiha a yeeyo.

³² Muluku ookhalana ekereja eniihaniwa Asempeleya, ni emosa ekereja ya Mululu, ni emosa *ela*, ni emosa *ele*. Ni, masi sothene sakhala-ru vamosa, sinrowa okhala nikhuru nuulupale na ophentana w'axinna, nto Muluku onoohela, onoothukumanya Ekerej'ele vamosa akuxe Yeeyo aroihaka wirimu.

³³ Khula elatarato yoosuveliwa, ehinatthi othomeiwa mpaani mwa irattelo, ehaana othomeiwa, ovira empa y'alipa-oowuulumela, toko. Mulopwan'ole opintanri, osivela, ahiiso, kileveleliwe, nkinwerya wuupuwela nsina nawe, opintanri Olya Wookiserya, hata siiso, yaahitthuneya ekumi awe yothene. Owo aahipinataro elatarato ele. Saari iyaakha soophiyaka ntoko miloko miili, wala iyaakha muloko, kookupali, wa omupintari Kristu ni Yuta. Nto mwaahiweha wira, mwa elatarato ele yoosuveliwa, wira mulopwana yoowo iikhalin'he ntoko Kristu, iyaakha muloko ohoolo waya aahiikhaliha ntoko Yuta? Ti yeeyo. Owo aahiikhaliha. Iyaakha muloko sa etampi, okhuma mulipa-oowiipa muulupale a oopera, wira akhale nipuro na Kristu, khurwa voopuroni va Yuta. Khivantthuneya okhala iyaakha muloko. Sintthuneya minuutu muloko, sinoowiirihani etthu emosaru. Sinoorukunxa mukhalelo anyu, mwa etampi. Masi, khula enamuna, elatarato ele yaahivira mw'alipa-oowuulumela othene.

³⁴ Nto ti yeeyo enuupuwel'aka sa Ekereja ya Muluku, nikhuru niihaniwe. Ahe, nkinihimya eyo ni wuulumela. Miyo koovira iphareya thanu na piili, ni kirina mukwaha aka wa neeraru w'ovira mulaponi mothene, ni atthu aniira, "Santu oophirikeya! Santu oophirikeya!" Ni kinniphavelaka mulaponi, ni nkinatoko omuphwanya santu oophirikeya nlelo. Nlo nsina xetwani aapwehenry'awe atthu. Ti yeeyo tu. Khiivo etthu iyo ntoko santu oophirikeya. Ni kookalana iyaalikelo sa khula emosa wa ikereja imiya thanu na mosa ni miloko mithanu na mosa ni thanu na tthaaru sikhanelle, ni sitthokihwiwe molumwenkuni, khiivo hata emosa eniihaniwa Masantu Oophirikeya. Ni eyo ti ya kuveerunu. Khiivo hata ekereja emosa Masantu Oophirikeya kinsuwel'aka. Tivo, eyo etthu xetwani iihann'awe paahi. Masi, vano, mwa sothene iya, itthu iya sothene, Muluku oopintari elatarato. Nto okathi mmosa ikereja iya sikhaani saanikhalaka va, amosa-amosa wa nyuwo. . .

³⁵ Kinnaaweha axilopwana ala oottweelela ikharari. Mmiravo aka, nsana; miyo kaari musaala, kisomaka, nto murumeyi mmosa khurwa khwira, "Kaanitthuna ovahana mukhono

n'atithi anyu." Vekeekhai, mmiravo aka oleliwe ni Munna Baxter n'akina, yaawo paahi, "Nnari," yeeyo tu, voowaakuva. Miyo khenikisivela eyo. Munnona? Hata wira miyo... Vekeekhai, nkikhanle okhalaka murumeyi a mutthu ni Muluku, nave. Masi kinoona wira onnikisivela ovahana mukhono n'axinn'aka. Onnikisivela wira siiso. Yookhala etthu mwa yeeyo, okisivela ovahana mukhono ni mu—ni murumeyi. Kahi murumeyi paahi, masi khula mwaana a Muluku, onnikisivela wira yeeyo. Miyo nkaasuwenle eyo mpakha amwaar'aka okileela okathi vakhani ohoolo waya. Ahe, owo aawenrye-ru omuleela murumeyi ule, "Minuutu mmosa paahi, awo ari ottuli iwe anoovekela, ni—ni kinimoona etthu anrow'aya ohimya." Ahe, eyo, eyo yaamukhala yooreera. Tivo miyo koomupwapwela vakhani mwaha wa yeeyo, wira ahiireke siiso. Munnona?

³⁶ Nto vano eyo ekeekhai, khivanihooleya, ntoko sihimaly'awe munn'ole okathi vakhani ovinre. Mwaira siiso, weso ohiyu miyo—miyo kinoolamwa, moone. Atthu anoopacerya olavula, ni othene khino aakhalana eretta, nto awo yapacerya olavula mwaha wa yeeyo, naanaanoru, nimphwanyaneya Nlaikha n'Apwiya vaavale vale wira nihimye yeeyo.

³⁷ Ookhala mutthu okilante, onikiweha miyo naanaano va, onsuwela wira eyo ekeekhai, sivinre minuutu vakhani paahi, wala voophiyaka ewoora ntero ni nuusu evinre. Muthiyana mmosa okilante va, ahaasuwela yaari exeeni, wira Nlaikha n'Apwiya naahilavula ni yoowo ohiyu umosa khimuhimeerya etthu, vano owo khaawenrye wiiwa saana. Masi olelo khwiiraneya, vano owo onnisuwela vano etthu enihimya'aya okathi Nlo naalavul'aya n'uwo. Nto moota, neemenle-ene vale nilavulaka n'uwo, Nlaikha n'Apwiya naahirowa mpakha khalayi khimuhimeerya ole waari mukattyamiho awe, ni wira yothene eyo yaari exeeni, ni—ni etthu owo uupuwel'awe, nto amosa amosa wa oophentiwa awe, ni moota Muluku aalavunly'awe khwira wira Owo aahilipiherya yeeyo, ni etthu yaarowa okhumelela. Vano ti siiso enrow'aya okhala. Munnona? Muluku aahimye siiso.

³⁸ Ahe, vano, ankhii imaara kamosa-kamosa otonko... Vano, ni khula yoowoona enimookkhalihani ootteettheyaxa, moone. Nto naanaanoru, vaniphii'anyu okereja ohiyu, munikhala ookhulumuwa voomalela mpakha vanoorkel'ayani osuwela etthu yo wira. Nto mukivekelele vano, moone, okhala wira okhuma muthukumano n'urowa mukina, n'urowa mukina. Ola waari muthukumano mmose-ene, waarowa okhala woovirikana, vaakhanle wira kaarowa owaani vano kihirawaka wira hat'etthu miyeeri miili, orowa okuxa nsifi naka n'urowa omiserya. Masi kahaana orowa okhuma muthukumano kirowaka mukina, okhuma mmosa kirowaka mukina, moone. Ti yeeyo eniriha.

³⁹ Nto nyuwo othene nvekeleke, nyuwo atthu vamuthukumanoni va. Kooleeliwa nsana ohiyu wira

miyo—miyo kaalavula ni mutthu mmosa, nto mutth'uwo khuhaakhula wiihaniwa iwo. Vano, eyo ti yoowoopiha, moone. Vahimmwaly'aya yeeyo. . .Ahe, imaara sikina mithuko iya khasinaarya, nookhala nipuro nooriipela varyari vale.

⁴⁰ Nto kinniweha Nlaikha n'Apwiya okathi Nlo nneemel'aya va, kinniwerya woona wi. Vano kinnoona wira ninnikhuma vary'aka, nto miyo kinooweha, Nlo ninookihiya khurowa nipuro nlo khweemela vaavo vakhani, ni kinniwerya woona Nenlo. Nto Nlo nnimwaarya khurwa yoowoona. Vano kinookhalana yoowoona. Kinooweha mutthu xeeni nlo nry'aya vakhiviru na yoowo. Kinoomuphwanya mutthu ene, vano khulavula. Ti yeeyo eniiraneya. Ti yeeyo enkumelela. Khivanthuneya waaleela athu othene yeeyo, masi ti—ti yeeyo eniiraneya, moone. Sothene sinkhala mwa mukhalelo wa erooho.

⁴¹ Vano mutth'uwo aahaakhule, yaarowa okhala ntoko omusoma Bibilia va ni wira, “Khimw'etthu mwa Yoowo,” n'umuhiya. Munnona? Vano ennikhaliha yoonanara. Tivo mukhale vookasopa, mukhale mwiiwelelaka, mukhale nwehaka. Nlo nalavula, mwaakhule. Moone, mukhale oolikana wira mwaakhule khula okathi.

⁴² Vano nto amwaar'aka, ni Munna Beeler ni anci-ene aya, voosiis'ula, yaakileela yeeyo, wira naamwiihana mulopwana mmosa mwaha wa munn'awe, nipuro nlo, wira yaahikhala etthu yahaalonke n'uwo, ni siiso. Nto mulopwan'owo khuhaakhula wiihaniwa, tivo owo khokhanle okhaliheriwaka. Eyo ti ya Muluku ni mulopwan'owo. Yoowoona ene khukihya. Nto nkaawerya ophwanya-tho, okhala wira owo khaakhunle. Tivo, mukhale nwehawehaka, mukhale ookasopa.

⁴³ Vano nikuxaka mhah'ola wa *Oxutta s'axetwani* ni olavula mwaha w'axetwani. Vano, atthu, yaahimmwaka wira “xetwani,” naanaanoru awo anoopacerya wuupuwela, “Oh, othipelela wala etthu siiso!” Masi axetwani t'ekeekhaixa ntoko Malaikha. Awo t'ekeekhaixa.

⁴⁴ Ni xetwani munepa wootakhala eekeekhaixa, ntoko Yesu Kristu sikhany'awe Mwaana a Muluku. Owo xetwani! Erimu ti y'ekeekhaixa. Nto yaahikhale etthu ene eyo ntoko omooroni, khiivo etthu ene eyo ntoko Erimu. Ni yaahikhale Yoohimala yooreerihwa. . .Ohukhumwa ohinimala, kiireke, khiivo oreeriwa Woohimala. Waahikhale othana, khuvo ohiyu. Munnona? Masi siiso ntoko okhanly'aya othana, wookhala ohiyu. Siiso—siiso ntoko okhanly'aya o—okhanly'aya muKristu, ookhala othanleliwe okhala namirima miili. Siiso okhanly'aya mutthu ori ooloka a Muluku, ookhala mutthu wira atakiherye yeeyo. Munnona? Vekeekhai ti ecalelo ni ekhottelo, yooriipa ni yootteela, sothene mwa makhalelo, y'ekeekhai ni yoowootha mapuro othene. Ni yookhala ehapari yooreera yoowootha, yookhala Ehapari yooreera y'ekeekhai. Wookhala

Opatiiso w'ekeekhai, wookhala opatiiso woowootha. Wookhala waamini wo wiipaka, ni wookhala wooloka. Yookhala etoolare ya wAmerika y'ekeekhai, yookhala etoolare ya wAmerika yoowootha. Ookhala muKristu ooloka, ookhala namirima miili ooloka, moone, iwo otakiha paahi. Tivo enniphwanyaneya eyo, vano sothene sinrowa hoothe. Vano, khanikhanle ovalaaniha. Muluku onnitthuniherya epula orupa.

⁴⁵ Owo akitthuniherye olavula va vakhani paahi. Alaleyi akavi ari va, nvenxe matata. Mapuro othene, alaleyi, nrowe noone matat'anyu. Ahe, Muluku ooreeriheni, axinna. Vano, vano, muhikuxe ela ntoko mwiixuttiho vano, masi, okathi vakhani nihinatthi opacerya mwah'ola w'ekumi, kinimooleelani etthu. Atthu akavi aPentekosite ari va? Nvenxe matata, mapuro othene. Ahe, nyuwo othene mw'aPentekosite. Vaareera. Kinrowa wooleelani etthu yaakikhumelenle okathi woopacerya ophiya eriyari anyu, nikhuru.

Miyo kaari oIndiana wenna, nipuro nimosa niihaniwa Mishawaka. Nikhuru noopacerya n'aPentekosite kaatonko aka wonna, niihaniwa a—Asempeleya a Pentekosite a Yesu Kristu, kookupali, wala etthu ntoko siiso, nikhuru nooreera n'atthu. Vano awo khwiitthokiha vamosa khwiisiihana Pentekosite Oowiiwanana. Awo khukawanyeya n'akina, mwaha wa etthu emosa ya opatiiso wa mmaasini. Eyo khenaakhalihana anamirima miili. Aakhala anci-ene ooloka, aKristu ooloka, ooloka saana arina Eroho Yowarya, ooyariwa vasya mmakhuruni mwaya. Ni Muluku ohaavaha Eroho Yowarya mwaha w'opatisiwa ni "Nsina na Yesu," ni ohaavaha akina opatiiso wa Eroho Yowarya, epatisiwe-ene ni "Tithi, Mwaana, Eroho Yowarya." Vano, "Muluku onnaavaha Eroho Yowarya, ale animwiiwelela," vano t'ani—t'ani orina, t'ani omwiiwelenle? Eyo eri vo.

⁴⁶ Vaakhanle wira munooliyala paahi, nto ale antthuna okhala enamuna emosa, ekhale, vano nyuwo mukelele ohoolo ni mukhale axinna. Ti yeeyo tu. Muhi...Etthu yiirin'he, waari waakawanya, waavalaaniha. Munnona? Exeeni? Waari waakawanya, waakhera, okawanya oxinna, waakhalihana ota ni wiivalaaniha. Nnari, mulopwana, hiyo khanivalaanne, hiyo nri mmosaru. Eyo ekeekhaii.

⁴⁷ Masi okathi waaphwanyaney'aka weiwo, miyo kaanaaweha atthu ale. Vano, miyo, kammala-ru okhuma ekereja emosa Patista ya khalayi y'Okuusini yoolikana, vano, khuwoona atthu ale, khukela nto awo yoopa ikuphi, enyakulaka, "Mmosa a yaawo, mmosa a yaawo, kinnitthapa ohimya wira ka mmosa a yaawo!"

⁴⁸ Miyo khuupuwela, "Wulu! Whish!" Naanaanoru, onrwa mutthu vale, ainaka ni woviiilipiha ntoko saawery'awe. "Ta-ta-ta-ta-ta," miyo khuupuwela, "mwiirelo xeeni mukereja!

Nkinatoko wiiwa etthu ntoko yeele.” Miyo khukhala kaawehaka, vaavale. Kaathuna osuwela, “Ahe, exeeni eniwiira atthu ale?”

⁴⁹ Vano, nyuwo mookiiwa omuthariha wahala a makhalelo aka, okathi waaphiyaly'aka muthukuman'owo weiwo. Masi ela etthu emosa kihinatoko aka ohimya, nkinatoko ohimya eyo khalayi, v'atthuni. Vano awo... Vano, nyuwo mawatthuna ottipiha mukaravatooroni mwanu, vano, mwiireke siiso. Vaareera. Vano, mwa yeela kaahiweha, nto vano khuupuwela, “Ahe, atthu ale t'atthu oomalela ohakalala kitonko aka owoona kookhalaru.” Awo khayuleliwa muru etiini aya. Hiyo aPatista ninnikhala oowuliwa muru vakhani, imaara kamosa-kamosa, moosuwela. Munnona? Ni yaarowaka ovekela, moosuwela, ankhala otuli wa nivekhulelo, moosuwela. Ni—ni, masi hiyo... Masi atthu ale khiyaakhala, munna, awo—awo yaahikhalanasa etiini muhina mothene, ota, ni mwa yaawo othene.

⁵⁰ Ahe, kinnuupuwela ohiy'ule okathi waaronw'aka vaplataforma. Khwiriwa, “Alaleyi othene vaplataforma.” Waari muthukumano. Awo yaahaana okhalana nno Onkela epheyo, mwaha wa—mwaha wa mulattu wa makhuli, nlamulo na Jim Crow a Okuusini. Tivo awo othene yaathukumanne weiwe a mapuro othene. Vano, miyo kaakilanthe osulu iwe. Nto owo khwira... Ahe, vano yookhala... Kaahiwiwa alaleyi othene othana ole wothene n'uhiyu wothene. Khuromoliwa mulaleyi mmosa mutokweene, owo aari mulopwana ooriipa aarwiye, aarina ikharari vakhani paahi mmuruni mw'awe, *siisaale*, aawanre ekhasako yoorakama ya mulaleyi jaarina mwiila, moosuwela, mukala wa manri, ni waari okathi wooviha. Mutokweene owo owooniha othunku khurwa vale *sa*. Owo khwira, “An'aka ophentiwa,” owo khwira, “Kinthuna kooleleni,” khupacerya olaleerya. Miyo kaari ootepaxa oyeva kaakilanthe vaplataforma. Vano nto owo khwira, “Kinimoolelani!” Owo khukuxa yoosoma awe mwa Yobi, “Mwaari vayi okathi waapattux'aka olumwenku? Mukileele vatthu alipiheriw'aya.”

⁵¹ Alaleyi othene ala akina yaahilaleerya mwaha wa Kristu, ettharaka etthunelo yoolimaleleya. Miyo khuwiiwa, khukisivela. Masi kahi mulopwan'ole mutokweene! Owo aaronwe otuli voophiyaka iyaakha ikonto muloko olumwenku ohinatthi otoko opacerya. Owo aawenle Wirimu khukhuruwa akhumaka wirimu, etthu yiiraneya. Etthu awo yaalaleery'aya, yiiraneya, okathi w'othana; owo aalaleya mwaha w'etthu yaakhumelela Wirimu. Owo khimuruuha Kristu mwa ekhweyi yoowaataleleya, khutthikela nipuro nlo wu mwa Yoohimala. Vano, khisaavinre minuutu mithanu alaleyaka mpakha mutokweene owo, Etthu emosa khimuvana. Owo khutuphela osulu khukumaniha ikosa sawe, khunyakula, “Wuuuup!” Owo aahikhalana opuro woophiyeryaka orin'aka vasulu va. Owo khwira, “Khamurina opuro oniphiyerya wira kilaleye,” vano khurowa.

52 Ahe, miyo khuupuwela, “Vakhala wira eyo ennimwiiriha mulopwana orina iyaakha soophiyaka miloko mithanu na miraru, yaarowa okiiriha exeeni miyo? Ti yeele entthun’aka. Ti yeele entthun’aka.”

53 Masi yaakitikinini’he yaari ila. Vano, ninlavula mwaha w’axetwani vano. Etthu yaakitikinini’he, kaahaaweha alopwana anli. Mmosa aakilanthe epantte emosa, nto mukina ekina. Nto okathi Eroho yaakhuruw’aya, axilopwan’ale yaanivenya n’ulavula ilavulelo n’anyakula, n’ukhala ootteela owanoni. Nto miyo khuupuwela, “Oh, wulu, vaakhanle wira kaaniwerya okhalana yeele!” Munnona? “Oreerexa zeeni! Oh, eyo e... Okisivela yeele pah!” Ahe, miyo khurowa mmatta mwa nakhuwo. Ni kihootharihelani wahala a makhalelo aka. Moosoma muliivuruni. Miyo khurupa ohiyu wothene. Nto khutthika voosiisu aya, tivo miyo khuupuwelela wehererya. Kookhalana enamuna yo wira itthu ohinkhal’aya mutthu onsuwela woohikhala Muluku ni miyo. Vano, eyo, kinkuxa nlikanyiho khurova okumana ni erooho ya mutthu. Nyuwo munnoona eyo vaplataforma vaava va. Munnona? Vano nto khupacerya ovaanela ni mmosa w’axilopwana ale. Miyo khuwoona, yaakilaathanse vamosa, ni yaanivarana matata ni wiina n’anyakula. Miyo khuupuwela, “Oh, wulu, ele enkhala ntoko y’ekeekhai wa miyo!”

54 Nto khunvara mmosa ntata nawe. Miyo khwira, “Ehaali anyu, mulopwana?”

55 Owo khwira, “Ehaali anyu.” Mulopwana mmosa oosivela, ntoko mulopwana oolakeya. Owo khwira . . .

 Miyo khwira, “Nyuwo mwa murumeyi?”

 Owo khwira, “Nnari, mulopwana. Miyo ka mukristu pure paahi.”

56 Nto miyo khupacerya nvaanelo mwaamukhaani ni yoowo wira kiphwanye erooho awe. Munnona? Owo khaasuwela eyo. Khaavo aasuwela. Miyo nkinahimyeke hat’etthu ya yeeyo. Iyaakha ohoolo waya, kihinatthi ohimya. Vano awo... Masi okathi ophiyenry’aka osuwela, aakhala ntoko eekeekhai, oomalela, mulopwana mmosa muKristu! Mulopwan’ole aari mutthu oowaarya a Muluku mara. Miyo khuupuwela, “Munna, ti yooreera.”

57 Masi mpantte wootikiniha, okathi omuvanry’aka mulopwana mukina, yaahivirikana. Owo aakhala ni muthiyana mmosa ahaari mwaar’awe. Eyo ekeekhai. Nto kaahoono eyo omuphiyerya yoowo, yoowoona. Miyo khuupuwela, “Oh, wulu, ehikhaleke siiso.” Nto mulopwan’owo... Miyo khuupuwela, “Vano, vano, erooho ela eriyari y’atthu ale ti yoovonyeya. Ti yeeyo ekhanly’aya.”

58 Vano ohiy’ule okathi e... khurova vamuthukumanoni, nto eparakha yaamukhuruwa, miyo kaaninvekela Muluku, ni

Eroho Yowarya, Nlaikha n'Apwiya naanikhalela onamoona wira yaari Eroho Yowarya. Nto Eroho emosaru yeeyo yaammorela mulopwan'ola yaanimmorela mulopwan'ole. Nto okathi Eroho yaamor'aya, oowanli aya yaanivenyasa, ni oowanli aya yaaninyakula ni okhuwela ni waattotopela Apwiya, n'ulavula ilavulelo ni wiina. Miyo khwira, "Miyo—miyo—miyo nkinwerya osuwela saana, Pwiya. E...Nkinwerya woona yeeyo mBibiliani, vatthu vakhanly'aya okhalaka yoolikana." Vano miyo khwira, "Alakela kiroothepiwa." Munnona? Miyo khwira...Vano, va, miyo—miyo nkinwerya...Miyo ka—miyo ka namatthariha mulipiheryo voomalela mBibiliani. Ehaana okhala Yeela. Munnona? Miyo khwira, "Pwiya, Nyuwo munnisuwela mukhalelo aka, ni miyo—miyo kihaana woona muhina mwa Masu Anyu. Nto miyo—miyo nkinwerya osuwela saana. Eroho Yowarya yammorelaka mulopwan'ola, Eroho Yowarya ennimmorela mulopwan'ole, nto mmosa a aya t'oreera murima vano mukina namirima miili. Ni koosuwela wira ti yoowo." Koosuwela eyo. Ehikhanle...Kaahaana onvara mulopwana ene khumooniherya, wala omwiihana vaavale vale khimuhimeerya.

⁵⁹ Siiso kaawery'aka n'ule aakilanthe va nsana ohiyu, ahaari hat'etthu woohikhala na—namawoka, aari mmosa eekeekhai aakilanthe vale. Nto miyo kaahaana wira koonihenrye-ene yeeyo, masi aamuvenya apacerye onyakulihana. Tivo miyo khuhiya khuvira paahi, mwaha wa muthukumano, masi kaanimusuwela. Ayo, mulopwana.

Aahikhala mmosa, anli a yaawo, yaakilanthe ottuli iwe, ohiyu umosa, aniira mpantta wa ekereja emosa opooma weno nno. Oowuulumela saana! Miyo kaahiwoona. Masi, moonihenrye-ru, waamupacerya mulattu ene. Kihira eyo imaara sinci-ene. Miyo kinimwaahiya paahi, moone. Khiva mulattu. Muluku onnisuwela, Owo t'ori Mphuki. Mwaahiye ekiihane emaara emosa, nto munimoona etthu wiiraneya, moone, mmuhiye.

Ntoko xetwani, nkinammwiihaneke xetwani. Owo aarimoorwa paahi wa miyo khukipaca. Vano waari okathi Muluku aakenly'awe mmutekoni, moone, eyo ekeekhai, nto mwaahoonu etthu yaakhumelenle. Vaareera. Masi kinoohiya paahi khuvira. Khukhaliha muthukumano woorika, maana erooho ele yaamoorwa wa miyo okathi wothene, moone. Vano nto miyo khukelela ohoolo paahi.

⁶⁰ Masi vano, axilopwan'ala, nkaawerya osuwela saana. Ni saari iyaakha piili ohoolo waya, wala tthaaru, waary'aka oGreen's Mill iwe, Indiana, nno, otakhwani yoosukiwa ya maskuteero. Kaari weiwo muttupha mmosa onrow'aka ovekela. Nto weiwo, miyo khwira, "Pwiya, nkinwerya osuwela saana etthu yaakhumelenle nikhuru nle n'atthu. Atthu oolokaxa otonko aka okumanana kookhalaru, nto nki—nkinwerya osuwela

saana moota yaakhanly'aya okhalaka eroho yotakhala. Ery'ene e. . . vakhala wira nto. . . Nyuwo munnisuwela oxariya wa murim'aka. Nyuwo munnisuwela moota onoophent'akani ni moota onoorumeel'akani. Nto Eroho yeeyo eri va, ni miyo, yaari mw'athu ale. Nto va Eyo yaari mwa mmirav'ole, iwe, enamuna emosaru yeeyo." Vano nkinwerya osuwela saana.

⁶¹ Vano Apwiya khukhuruwa mwa omoriwa Waya ikharari khukooniha. Yaari ila. Ehaana okhala Yoolempwa, toko. Awo khwira, "Mmuttotte Bibilia anyu." Vano miyo khimuttotta Bibilia aka. Kinoona wira kaahinvarela Bibilia ole minuutu muloko ohikhanle hata mutthu. . . hata Nuulumo orwa-tho. Miyo khulipelela minuutu vakhani paahi. Niyo khuwiiwa Awo yiraka-tho, "Mukhunle mwa aHeperi 6 mpacerye osoma." Vano miyo khukhunla. Nto vaphiyaly'aya vaavo, Owo aahimy'awe wira, "Etthaya ennirupeliwa epula imaara sinci-ene wira etthokihe, elimmwe ekhanle ya. . . masi miwa ni malaxi oonanara, otakhaliwa waya woophiya, emalelo aya opahiwa." Nto miyo khusuwela saana okathi ene yoole.

Miyo khuupuwela, "Eyo vo. Kinnimuxukhuru Muluku! Eyo vo." Munnona?

⁶² Vano, Yesu ohimnye wira, "Mulipa oomisa aahikhuma arowaka omisa epyo," Owo khahimnye? Vano, nyuwo othene m'waKristu va. Athu othene aavenxa matata, mwa khula enamuna, aPentekosite, aKristu ooyariwa vasya. Vaareera. Awo. . . Nto Owo ohimnye wira, "Mulipa oomisa aahivenya arowaka omisa epyo. Nto okathi aarup'awe. . ." Omumula Wawe, okhwa, ehuhu. Munnona? "Nto okathi owo aarup'awe, nwanani khurwa khwaala nthakathaka mmatta." Nthakathaka exeeni? Malaxi oonanara, anampiriviri ni itthu. Vano, "Nto okathi mulimi (mulaleyi) oonaly'awe nthakathaka nla ninnuw'aya, khwira, 'Mukihye kirowe kaphelakase.' Owo khwira, 'Nnari, nnari. Munooophela etriku nave. Muhiye soopiili sinnuweke vamosa.'"

⁶³ Yookhala ematta y'etriku va. Aakhala malaxi anrapela, urtiika, malaxi oowunkha, itthu sothene sikina. Eyo ekeekhai? Masi, vano, yookhala etriku memmo. Vano, ethaya ennirupeliwa epula imaara sinci-ene, wira ekhuwari. Vano, epula enrupelani? Kahi wira ekhuwari urtiika. Vano nwehe ni nwiriyane. Kahi wira ekhuwari malaxi anrapela. Epula enrumiheliwa etriku, masi urtiika ni malaxi oonanara sinnivoliwa nthona ntoko etriku enivoliw'aya. Nto epula ene yeeyo enrupela etriku ennirupela malaxi oonanara. Vano malaxi oonanara anniisookolela siiso, ni ootteeleliwa murima ni ohakalala, siiso ntoko etriku envenyaaya khwiisookolela.

⁶⁴ "Masi ni mihokorokho saya munimwaasuwela." Eyo vo. Munnona? Vano, Eroho Yowarya emosaru enniwerya omureerihha namirima miili. Eyo ehaamana athu kamosa-

kamosa a nyuwo mArminiyaano, masi eyo Ekeekhaii. Eyo Ekeekhaii. Ereerelo murima ahiixuttihiwa, yeeyo miyo enaamini aka ereerelo murima, nave. Masi Eroho emosaru, epula ennimurupela naxariya ni ole ootakhala, masi ni mihokorokho saya munimwaasuwela.

⁶⁵ Kaawehaka nno khurowa okuxa etriku, kinkuxa etriku, masi malaxi oonanara othene aatthukiwa mavisu. N'awo ankhala ni epula emosaru yeeyo emorenle etriku. Vano epula khiyaarumiheliwe malaxi oonanara, yaarumiheliwe Etriku. Masi epula ery'ene mmatta, etriku ery'ene. . . malaxi oonanara ery'ene mmatta w'etriku, yaahaakhela muraarelo woowaatta w'epula ntoko sikina. Nto epula yeeyo emosaru yaakhalin'he ekumi etriku, yaahikhaliha malaxi oonanara makumi.

⁶⁶ Itthu sothene s'ephattu sinthoonyerya s'erooho, ntoko siniixuttih'ahu. Eyo vo, oxutta s'axetwani, axetwani antakiherya oKristu, nnya, ni eparakha. Eyo kehiyo eleethi yookhamuliwa, axinna, mwaaweryaka owurya. Munnona? Munnona? Vano, eyo—eyo Ekeekhaii.

⁶⁷ Tivo, miyo nkooponwe olelo okhala wira kinniweya onyakula. Miyo nkooponwe mwaha wo wira kinnoona ntoko wira kihoopowa. Miyo kooonwe mwaha wo wira koomaliherya sinthun'awe Muluku sa mBibiliani mu. Yesu ohimmye wira, “Ole oniiwa Masu Aka ni onimwaamini Ole okirumme, ookhalana Ekumi ehinimala, ni khanrowa ohukhummwa, masi oovira mookhwaani khuphwanya Ekumi.” Kinnaamini yeeyo. Eyo ekeekhaii. Nto mwa sootthuneya seiyo miyo kihoopowa, okhala wira Muluku ohimmye siiso.

⁶⁸ Vaakhanle wira awo yaamukileela wira mooponwe mwaha wo wira mutthu ohimmye wira, “Epheyo yoompe n'ikuru erookimana wiitho,” eyo ti yooreera, masi kinthuna kisuwele vatthu xeeni epheyo eyo yoopale n'ikuru yaakhummy'aya-wo ehinatthi okimana wiitho, moone. Vano, enamuna xeeni ya makhalelo munrow'anyu weettela numala epheyo yeeyo yoopale n'ikuru woomanani? Munnona? Moone, mwaha wa mihokorokho sanyu munuweliw'anyu. Tivo, axetwani anniweya ovara muteko eriyari y'aKristu. Nyuwo munnaamini yeeyo? Nkanweheni Paulo, Paulo oohimya. . .

⁶⁹ Vano va ti nipuro ale a Epula Yookiserya. . . Akhala mmosa a nyuwo va, mukilevelele nkinihimya hat'etthu ya nthowa ni nyuwo. Nkaakhanle woohimyanani hat'etthu ya nthowa ovikana saarow'aka waahimyanana Asempeleya, wala akina, aPatista, wala mutthu ti mutthu mukina. Eyo Ekeekhaii ekhanle Ekeekhai. Ti vaavo mukhumenly'anyu ota, yaari ila: nyuwo munaakhaliha maprofeta atthu ale ni itthu sihikhanle maprofeta. Maprofeta “khaniixaatheriwa matata” n'urummwa orowa. Maprofeta anooyariwa. Munnona? mBibiliani, yookhala

yoovaha y'eprofeta. Ti vaavo waari ovonya wanyu, wa yoovaha y'eprofeta ni profeta. Yoovaha . . .

⁷⁰ “Khalayi, Muluku aahaalavuliha axitiithi ni inamuna sinciene ni moolumo a maprofeta, mahiku ala ookiserya mwa Mwan’Awe, Kristu Yesu.” Nto Erutthu ya Kristu erina soovaha thanu na xexe sa erooho sinvara muteko mwa yeeyo. Nto pooti okhala mwa muthiyan’*ola* ohiy’ula, ohimya s’eprofeta, alakela khuhikhala-tho makhalelo awe othene. Pooti okhala mwa muthiyan’*ola* ohiyu onttharelana. Pooti okhala mwa mulopwan’*ola* okathi onttharelana. Pooti okhala mwa *ole* ottuli iwe, okathi onttharelana. Eyo khemmukhaliha profeta, khemmukhaliha hata mmosa profeta. Eyo yoovaha y’eprofeta mwa nyuwo.

⁷¹ Nto mulopwan’owo wala ehimeryo eyo y’eprofeta ehinatthi ovahereriwa mukereja, ehaana othorihiwa ohoolo w’aphuki anli wala araru a erooho. Eyo ekeekhai? Nittharihaka, vano, Paulo ohimye wira, “Nyuwo othene pooti olaleerya s’eprofeta, mmosa-mmosa.” Yakhala etthu onuupululeliwa *ola*, *ole* amaale. Ahe, eyo yaamukhaliha nikhuru nlo nothene maprofeta weso, nittharihaka muxuttihieryo w’olelo. Nnari, ekereja Pantekosite, hiyo nrina itthu sothene sootepanyeya. Nto mwaha wa yeeyo Muluku ohikhanly’awe orwaaka, mpakha nilakiherye etthu ene nihele mBibiliani. Ti yeeyo. Ohaana otthariwa mphito w’ekeekhai. Munrowa sayi oteka empa muhiwehale eplanta? Munnona? Ehaana opaceriwa oratteene.

⁷² Vano, mmo, profeta, khonatoko wooniwa mutthu weemela ohoolo wa Yesaya, Moise. Aahikhala mmosa eemenle, Kore, nihiku nimos, khweererya ovaanyihana ni yoowo, nto Muluku khwira, “Mwiivalaanye, Kinrowa otthukula etthaya nto. . .” Profeta onooyariwa. “Soovaha ni wiihaniwa. . . -woohirukunuxa murima.” Iwo p’utthokiha wa Muluku khalayi ene, okhuma mwanamwane. Sothene saari oratteene voomalela, vekeekhai etthu owo aahimy’awe yaakhala ekeekhai ni yoolipiheriwa ni yowooniheriwa. Awo Masu a Muluku, animurweela profeta. Masi yoovaha y’eprofeta eri mukereja.

⁷³ Vano nyuwo muhimye wira, “Ahe, maprofeta t’a Waataana Wa Khalayi.” Oh, nnari! Waataana Wa Naanaano yaahikhala maprofeta.

⁷⁴ Hakapu aari pro—profeta a Waataana Wa Naanaano. Nkawehani Eroho y’eprofeta emoraka iwe khimuleela Paulo. Nto khurwa Hakapu akhumaka oYerusalemu, khumphwanya Paulo, khwiitthukela musako awe, khurukunuwa khwira, “SIISO ANIHIMYA T’APWIYA, mulipa onwara ola onoothukiwa ni makwicili n’uphiya oYerusalemu.” Hakapu, yoowo aavennye khuhimya, khuhimya khalayi ene etthu yaarowa okhumelela, owo aari profeta, kahi mutthu aarina yoovaha y’eprofeta.

75 Ni yoovaha y'ovoniha ni soovaha sothene iyo, apatthani aka aPentekosite, erimootokinihani. Soovaha siri mukereja, mwa khula mutthu mukereja, mutthu ti mutthu opatisiwe mw'Erutthuni. "Mwa Eroho emosaru hiyo othene noopatisiwa." Ni Bibilia oohimya. . .

"Ahe, kookhalana yoovaha y'ovoniha."

76 Ahe, Bibilia ohimye wira, "Mulapulelaneke soottheka sanyu mmosa ni mukhw'awe, ni nvekelelaneke mmosa ni mukhw'awe." Khula mutthu anvekeleleke mukhw'awe. Hiyo khanihiyo nikhuru nookawanyeya; hiyo na nikhuru n'anamunci-ene, noothukumana. Munnona?

Vano, ni ti siiso axetwani imaara sikina anvar'aya muteko.

77 Vano nkawehani etthu Paulo ehimaly'awe, "Mmosa aalavulaka ilavulelo nto mukina ataphuleleke, ni khula etthu enihim'y'awe, ethorihiwe ehinatthi—ehinatthi ekereja waakhela."

78 Vano, khenrowa okhala ohimya Yoolempwa, wala etthu ekina ntoko yeeyo. Muluku khoniitthikela Mmansawe. Masi onrowa okhala olopoliwa ekereja. Nto aphuki ooloka yahimya wira, "Nrowe naakhele yeeyo. Vaareera, yaari y'Apwiya." Anenli ahimya wira, "Nrowe naakhele." Mwaano mwa anamoona anli wala araru, khula nuulumo nikhale noolipiheriwa. Vano ekereja enimwaakhela ni wiilikanyiherya yeeyo. Eyo yaahiiraneye, ele ohim'y'awe, weso mookhalana erooho yootakhala eriyari anyu. Eyo ekeekhaii. Nto yiiraneya vale, nto mmuxukhuru Muluku, Eroho ya Muluku eri variyari vanyu. Munnona? Vano, ti vaavo murin'anyu oweha saana ni wiikasooa. Tivo, muheererye okhanyererya. Nkaakhanle wiikhalihaka a maitho ookhwila kirine-ene ooripelela, moone, ahaana okisivela maitho ooripelela. Vano, ti vaavo axetwani anvar'aya muteko muhina mwa mukhalelo w'atthu a muroohoni.

79 Vano nookhalana etthu yoowiixerya enikhuveela va, ni kinroromela wira kihyo yoowiixeryaxa. Vano mwa Samuweli Oopacerya 28, kintthuna kosome Yoolempwa emosa va okathi ene yoola. Kintthuna wira nwiriyane oratteene. Ni kintthuna kaaruhe "axetwani," kiwooniheryeni moota awo anvar'aya muteko saana mukereja, ni moota Satana orin'awe yoowooha wa khula yooloka ekhanle. Vano munoowerya wona, ntoko Bibilia, axetwani anoorwa variyari v'Akristu ni anootakiherya.

80 Nto imaara sinci-ene ninnihim'yaka atthu okhala aKristu okathi awo aniir'aya, "Kinnimwaamini Yesu Kristu." Vano, axetwani annaamini etthu emosaru, ni annithukumela. Eyo kehiyo ethoonyeryo wira muhoopowa. Ohiyu umosa kintthuna kilavule mwaha w'othanliwa, vano nto munimoona etthu enihimya woopowa. Munnona? Kuhiyo hat'etthu nyuwo mwaarin'anyu naata, opacerya wene, wala vookiserya, wala etthu mukhanly'anyu wira. Muluku onimoopola mutthu,

voohitthuneya etthu. Wulu, eyo yookela saana, kahi siiso? Vano, vanreerela mukumihe eyo mwa eyeetiheryo anyu, niry'ene vaavo. Vaareera.

⁸¹ Abrahamu aari epacerelo ya waamini wahu. Eyo ekeekhahi? Oh, Abrahamu aahikhalana natiri. Nto Muluku aamwiihanne Abrahamu mwaha wo wira owo aari mutthu oottittimiheya, kookupali? Nnari, mulopwana. Owo aakhumme oPapiloonia, elapo—elapo y'oKhalteya, muttethe wa oUri, nto Muluku aahimwiihana khupaka waatana Wawe n'uwo, voohitthuneya etthu. "Miyo kinrowa owoopolani. Ni kahi nyuwo paahi Abrahamu, masi Osuulu anyu," voohitthuneya etthu.

⁸² Muluku aapanke mwaataano ni mutthu, vano mutthu onoonona mwataano awe khula okathi. Mutthu khanatthariheleke mwaataano awe ni Muluku. Ikano khasinasukiweke. Awo khayaawerya osuka ikano. Kristu khurwa khutaphula ikano, Yoowo mwaneene, 'okhala wira mahala yaahinvaherya Moopoli. Moise aavahenrye enamuna y'ovuluwa, vano nto, ovuluwa, kiireke, vano nto atthu, numala yeeyo, awo nlelo yaatthuna etthu yo wira. Mutthu kweekwe oneererya wira etthu wira aisoopole mmansawe, vahiweryaneyaka wira. T'iphattu awe. Amalaka-ru osuwela wira khaawanr'etthu, omatta w'Edeni, owo aapanke ikuwo sa nikukhu n'efiiku. Eyo ekeekhahi? Masi khuphwanya wira khiyaavar'etthu. Khiivo etthu mutthu okhanly'awe wira wira aisoopole. Muluku oniwoopolani, voohitthuneya etthu, moovirani mwa okathi wothene. Vano nto moopowa vale, muhoopowa.

⁸³ Nkwanweheni Abrahamu. Iwe aaphwanyaneya mulopwan'ole, khurwa, nto Muluku khunvaha elapo y'oPalestina khumuhimeerya wira ahikhume-wo. Khula muYuta aakhuma oPalestina aari namatthikela ottuli. Muluku aamuhimenrye wira akhale weiwe. Muluku oohimeeryani wira mwiire etthu, vano nyuwo kuhinaira, weso mwa namatthikela ottuli. Eyo ekeekhahi? Vaareera, eyuumu khukhumelela, wira yeererye waamini w'Abrahamu. Nto Abrahamu ohiya okhala weiwe, nnari, owo khaawenrye okhala weiwe, owo aarootthyawa, khimukuxa Sara khurwa ikilomo soophiyaka ekonto emosa ni imiya thanu na mosa (kaanitthuna kirine-ene okathi w'olavula yeeyo) mpakha elapo ekina.

⁸⁴ Vano vaphiyaly'awe iwe, vano nto aahikhala mwen'ola muulupale iwe, Apimeleekhi. Owo aari mmiravo ni aanimphavela mwaara, tivo owo khumphwanya mwaara a Abrahamu, Sara, khusiveliwa ni yoowo. Nto Abrahamu khwira, "Vano, mmuleele wira nyuwo mwa murokor'aka ni miyo ka murokor'inyu."

⁸⁵ Vano eyo yaahimusivela Apimeleekhi, tivo owo khwira, "Vaareera, hiyo ninoomukuxa nimuroihe empa ya mwene." Nto

kinooona wira athiyana yaahimutthokiha, vano owo aarowa omuthela mmeeloni mwaya.

⁸⁶ Nto Apimeleekhi aari mutthu ooreera murima mutthu a exariya. Vano ohiy'ule, owo arupaka, Apwiya khimukhumelela khwira, “Eri ntoko mwa mutthu mukhwiiye.” Awo khwira, “Mulopwana . . . Muthiyana mmukunx'anyu vo wira mmuthele, mwaara a mulopwana mukina.” Vano nwehe. “Mwaara a mulopwana mukina.”

⁸⁷ Vano, owo khwira, “Pwiya, Nyuwo munnisuwela oreera waka murima,” mutthu naxariya, ooreera murima. “Nyuwo moosuwela oreera waka murima. Mulopwan'owo okihimenrye wira aari 'murokor'awe.' Ni muthiy'an'owo khakihimenrye, mwaneene, wira ole 'murokor'aka'?”

⁸⁸ Owo khwira, Muluku khwira, “Koosuwela oreera wanyu murima, tivo ti Miyo ene koohuluxaleni okitthekela. Masi ole profeta Aka!” Aleluya!

⁸⁹ Owo aari exeenei? Namatthikela ottuli, ni namavirikanya moolumo, nawoothe. Eyo ekeekhai? Oh, nnari, kuuvo wootha vakhaani woohittheka. Onkhala wootha woolakela ahiiso khuhiyo wootha nnakhala. Mulopwan'owo omphwanyaneya iwe ahimyaka itthu soowootha voohuuliwa muru, ahimyaka wira aari “murokor'awe” ary'ene mwaar'awe, aviraviraka, ni namatthikela ottuli.

⁹⁰ Nto va aari mulopwana mmosa naxariya aaphwanyaneya ohoolo wa Muluku, nto khwira, “Pwiya, Nyuwo moosuwela murim'aka.”

⁹¹ “Masi nkinrowa wiwelela mavekelo anyu, Apimeleekhi, masi mmukuxe . . . mmuhokoloxe ni mmuhiye ole oovekeleleni. Owo profeta Aka; Miyo kinoomwiwelela.” Ayo, namatthikela ottuli, nawoothe, masi, “Owo profeta Aka.” Ekeekhai iyo? Owo Bibiliaa.

⁹² Vano, muhirwe mpakha mukaano ola nno epantte y'eKalvino, “Mwaphwanya-ru mahala okathi wothene mahala,” 'okhala wira munoophiyerya otakhaliwa. Munnona? Vano, okathi vakhani paahi, ninoophwanya okathi esumana yeela wira niruuhe eyo ni niwooniheryeni moota ery'aya yoolikana. Masi muhuupuwele wira okhala paahi wira muhiira etthu yoonanara wira moopweteya namukhuluwiru. Nyuwo mwa mwaana a Muluku, muyariwe ni Eroho ya Muluku, nyuwo mw'ana alopwana n'athiyana a Muluku, ni mihokorokho sinookhalela onamoona sineene. Eyo vo.

⁹³ Vano, ala ari va, amphwanyaneya mulaponi. Vano, kintthuna kisome va, eversiikulu 6.

*Vano Sawuli aahaakoha APWIYA, APWIYA
khiyaamwaakhunle etthu, nnakhala moolohani,
nnakhala ni Urimi, wala ni profeta.*

Tivo nto Sawuli aahaahimeerya arumeyi awe wira, Mukiphavelele muthiyana onkoha minepa, kimpavela orowa, waaxerya.

Kaamuwerya orihela ekopo va wa etthu emosa, mwaha wa paahi . . . “Mukiphavelele muthiyana onkoha minepa.”

. . . Vano murumeyi awe aahimwaakhula wira, Ookhala muthiyana mmosa onkoha minepa wEndori.

Sawuli aahivirikanyiha, khuwara ikuwo, ikuwo sikina, khurowa owo, anli . . . atthu anli n’uwo, yaahiphiya wa muthiyan’ole ohiyu: nto awo khwira, kinoovekelani wira, . . . -xerye n’iroho anyu y’okoha minepa, mukiihanele . . . ole onrow’aka woohimeeryani.

Nto muthiyan’owo aahimuhimeerya wira, Moone, nyuwo moosuwela wira Sawuli ohiira, nyuwo moosuwela, ohaakhottiherya othene ale onkoha minepa, ni . . . anahako, mulaponi mothene: vano . . . munikireya ntapha mwa makhalelo aka, ni muniphavela okiiviha?

Nto Sawuli aahaakhula, khulapha ni nsina n’APWIYA, iiraka, Mwaha w’APWIYA ari akumi, khiivo etthu yootakhala eni yookhumeleleni . . .

Nto muthiyan’owo aahimwiirela, Kiwiihaneleni . . . munepa xeeni? Nto owo khwira, Mukiihanele Samuweli.

Muthiyan’owo vamoonal’awe Samuweli, aahikhuwela vaalupale: muthiyan’owo khulavula ni Sawuli, wira, Mukootothenleni? nyuwo mwa Sawuli.

Vano mwene aahimuhimeerya wira, Muhoove etthu: mmonne pani? Nto muthiyana khwira, miyo . . . Sawuli, kiwonne amuluku ankhuma vathi.

Vano owo khumuhimeerya, Owiitho wawe aalikana n’ani? Nto owo khwira, Mulopwana mmosa muulupale awelaka vathi; iikhunenle ni mukhumi muulupale. Nto Sam- . . . (Owo waari mukhumi yoowo wa profeta, vekeekhai. Munnona?) . . . aahisuwelaxa wira aari Samuweli, nto owo aahivenya ni . . . uuramaka mpakha vathi, khukokhora.

Samuweli aahimukoha Sawuli iiraka, Mukihaaxenleni waamumul’aka, khukiihana? Sawuli aahaakhula, wira, Koovelavela vanci-ene ni wiiniwa murima; okhala wira aFilisti t’ankituphela, vano Muluku ookinyanyala, ni khotthunne okaakhula, nnakhala ni profeta, hata ni moolohani: tivo miyo . . . vaviihann’akani nyuwo, wira nyuwo mukileele kikhanly’aka wira.

Vano nto Samuweli khwira, Mwaha wa xeeni... nyuwo okikohaka... miyo, musuwelaka wira APWIYA ahoonyanyalani, ni—ni ari nwanan'inyu?

Nto APWIYA t'awiireneni, ntoko saahimaly'aya ni moolumo aka: maana APWIYA aawaakhani omwene mmatatani mwanyu, khunvaha yoowo... Davidi:

⁹⁴ Vano, anci-ene a nyuwo, moolimalela ela. Vano ninthuna nikele voluluwanya, ni Muluku anikhaliherye vano, okathi vakhani, wira nikele mwa yeela. Vano nwehe. Aahikhala mulopwana mmosa, Sawuli, yoowo aatonko ottittimihiwa ntoko profeta, maana owo aahilaleerya ni maprofeta. Eyo ekeekhai, alipa-oosomiha? Vano, va mulopwan'owo aahitthikela ottuli. Eyo ekeekhai? Masi muupuwele vatthu Samuweli aahimmy'awe wira owo aamurowa okhala, ni yoowo, mmeeloni mwaya. Ookhwa vooihlekela, moone. Vaareera, nyuwo mwahinwiriwane Muluku, Muluku onimookumihani elapo ya vathi.

⁹⁵ Nkawehani epaphelo y'aKorinto vo, moota Paulo aakhalihaly'awe atthu ale oratteene. Owo iirale, "Yoopacerya, kinnimuxukhuru Muluku mwaha wa nyuwo, wira khasivo itthu iyo eriyari anyu, ni sikina, ni moota ehi—ehinoohaleel'ayani hata yoovaha emosa ya erooho." Aahimeeryaka etthu yaary'aya, vooपुरoni, mwa Kristu. Vano owo khupacerya waapwapwela, waahimeerya mwaha w'athiyana aya alaleyi, ni moota yiir'aya, ni moota awo yaaly'aya vameesa v'Apwiya.

Ni hata mulopwana mmosa aarupa n'ame awe oomuphwanya, nto owo khumwiirela mulopwan'ola mwa Kristu, "Avahereriwe xetwani, wira erutthu epweteye, wira munepa woopowe." Moone, ti yeeyo, omuvahererya. Bibilia ohimnye wira, "Mwaha wa yeeyo aakhala atthu anci-ene ari aretta ni oohilipa eriyari anyu, ni anci-ene anrupa," akhwiye voohipisa mwaha w'etampi. Muluku ookumihaleni mphironi; ethoonyeryo yooreera wira mwaari muKristu, mwaakumihiwe-ru.

⁹⁶ Nto, vano nwehe va, Sawuli aattittimihiwa ntoko mmosa a maprofeta, wala eriyari ya maprofeta, okhala wira owo aanilaleerya. Nto vano owo aahitthikela ottuli, okhala wira khaamwiiwelenle Muluku, ni omwene awe khwaakhiwa mmatatani mwawe khuvehereriwa mmatatani mwa Davidi, yoowo Muluku aamuttikitthenly'awe makhura ni Samuweli, ni murinki ule wa makhura.

⁹⁷ Nwehe, nto, wira saahikhala inamuna tthaaru s'awo osuwela itthu saakhuma wa Muluku; yoopacerya aakhala— aakhala profeta, yanenli waakhala oloha, ni yaneararu aari Urimi Tumimi. Nto khiivo emosa yaakhula. Vano, moosuwela ole okhanle profeta, ni moosuwela ele ekhanle yooloha ya muroohoni, ni moosuwela ele yaari Urimi Tumimi. Moosuwela, nihiku nlo kaahimukoha mu—mulopwana mmosa sa Urimi,

nto mulopwan'ole khaawenrye okileela yaari exeeni iyo, Urimi Tumimi. Vekeekhai, aari Muluku aakhula ni seiya. Munnona?

⁹⁸ Nto xetwani onnipaka yoowoothererya ya khula emosa wa seiyo; mukhwiri, profeta oowootha, ni namaxintta. Munnona?

Vano, Urimi Tumimi aathomeiwa vatthirima va Aroni, *va*, ni Urimi Tumimi aakhuneela maluku ale. Ni aathomeiwa mpaani m'okokhorela. Nto awo yaahikupali saana, yaamurowa ohoolo wa Muluku, wira ephwanye waakhuliwa, nto waarya waamuverunya vaUrimi Tumimi vale, wira, sinto waari otthuna wa Muluku, wala nnari. Vano, okathi Urimi Tumimi ahaakhul'awe. . . Vano, iwo waari waakhula waakhuma wa Muluku.

Vano, Urimi Tumimi oolelo; nahako okunxe nluku noowaarya, wira atakiherye Yeeyo; etthu yoowootha. Muluku ori mwa oraaru; oweriya wa Muluku ori mwa oraaru. Ni xetwani ori mwa oraaru, ni ikuru sawe siri mwa oraaru. Ni kinoowerya wooniherya ni Bibilia. Nto Urimi Tumimi uwo; naari nluku noowaarya xetwani onrumeel'awe olelo. Ni profeta oowootha va olelo, yoowo orin'ahu vano, aari. . . Ahiiso, mukhwiri, wala nahako iwe, okenle nipuro na profeta, epantte ya xetwani. Munnoona entthun'aka ohimya?

⁹⁹ Vano, nto, Urimi Tumimi oolelo Bibilia ola. Akhala mutthu onihimya s'eprofeta wala yooloha, nave kuhinalikana wala ehinatthikela oruma ni Bibilia a Muluku, ti yoowoothiwa. Muhaamini.

¹⁰⁰ Mulopwana mmosa aahikirweela woohikhala khalayi, a oHintiya, weiwo kintthun'aka orowa, mulaleyi mmosa ooreera murima. Owo khwira, "Munna Branham, kihoorwa va." Khwira, "Muthiyana mmosa aarina Eroho Yowarya, nto," khwira, "owo aari muthiyana mmosa oosivela, ooreera murima." Owo khwira, "Nto aahitheliwa imaara xexe, ni aakhala n'aiy'awe a neexexe. Nto miyo khwira, 'Ahe, vaaweryaneya sayi okhala siiso, Pwiya?'" Nto khwira, "Miyo khurowa wa Yaawo khwira, 'Oh, avuwihwe Muluku!' Khwira, 'Aleluya! Attotopeliwe Apwiya!'" Aari paahi mmosa wa yaawo, moosuwela. "Khwira, 'Aleluya! Attotopeliwe Apwiya!'" Khwira, "Apwiya khukiirela, 'Moone, kinimoolohihani etthu.'" Ni khwira, "Kaalonhe wira amwaar'aka, kaaroowona ekhalaka mooraruwani. Vano awo khutthikela wa miyo khwira, 'Oh, munootthuna okilevelela, Victor? Munootthuna okilevelela? Miyo khuhi. . .'" 'Vano,' miyo khwira, 'vekeekhai, kinimoolevelelani kookuxeni-tho.'" Owo khwira, "Vano, ti yeeyo kiiraly'aka." Khwira, "Moone, koolevelela."

¹⁰¹ Miyo khwira, "Victor, yooloha anyu yaari yoothamaleya saana, masi xetwani t'oruuhenleni."

Owo khwira, "Mwaha wa xeeni?"

102 Miyo khwira, “Khenlikana ni Masu a Muluku. Owo onkhala mooraruwani. Voomalela. Khokhanle okhalaka n’axilopwana axexe. Ekeekhai. Owo amuhiya ole khumutthikela ole oopacerya, owo ori mukhalelo wootepa ovikana saary’awe wopaceryani. Ohaana okhala ahitheliwe, makhalelo awe othene.” Miyo khwira, “Moosuwela wira eyo khenlikana ni Masu a Muluku. Vano awawe. . . Yooloha anyu yaari yoowootha.” Miyo khwira, “Khenrowa olikana n’Ila.”

103 Nto okathi profeta aalaleery’awe s’eprofeta, khuhimmwa, ni yaatthuna wooniwa sinto yoolaleerya ele y’eprofeta yaari y’ekeekhai, yaamuheliwa ohoolo wa Urimi Tumimi. Nto Nsu na Muluku naanipattiha waarya va Urimi Tumimi, nto yaari yoohivaanyiheya, Ekeekhai. Nto mutthu aruuha otaphulela, aruuha yooloha, aruuha etthu ya Bibilia, ni, wala etthu ekina, nto khuhinalikana ni Bibilia a Muluku, ti yoowoothiwa. Ookhala Urimi Tumimi oolelo. Masu a Muluku annilavula, ni nlo ti Nsu ninkhuma wa Muluku, ntoko Urimi Tumimi aary’awe Bibilia ahinatthi olempwa. Amen! Aleluya! Kinnoona okhala ntoko natiini naanaano va. Muhikoone ntoko namathipelela, mwaira vale. Miyo kinnisuwela, kinnisuwela vary’aka-vo. Nkitannyeyiye. Eyo ekeekhaii.

104 Va eri Ekeekhai, Masu a Muluku! Nkincala enamuna xeeni yooloha mwaarin’anyu, wala oprofeta xeeni mulalenry’anyu, yaahikhale-ru Masu a Muluku, ti yoovonyeya, yaahilikaneke-ru ni Masu awo. Owo t’okhanle mulattu ene olelo. Mmosa onkhalana yooloha, mmosa onkhala yoowoona, mmosa onkhalana elavulelo, mmosa onkhalana yoowuupululiwa; khukhaliha etthu yothene yootapanyaseya ni sothene, munikhhalana miromolelo n’ukawanya itthu sothene. Ehaana oruuihiwa mwa mulipiheryo woomaliherya, nto owo ti Masu a Muluku. Eyo ekeekhaii.

105 Ikereja sintekiwa vasulu va, eniiriwa, “Oh, Yesu onrwa vakhavaloni yootteela. Koosuwela. Miyo koomoona Owo mwa yoowoona.” Empakiwa ekereja ya muthinto yoowo. “Oh, aleluya! Owo onrwa mmeekuni.” Empakiwa emosa ya muthinto yoowo. Sinookawanyeya, ovalaaniha, ni emosa eniihana ekina “erintta ya nrepo,” ni “nipuro ninthukumana itthupo,” ni itthu sothene siiso. Vano, munna, eri wira yooniherye, opacerya wene, wira murim’anyu khokhanle saana ni Muluku mwiiraka-ru siiso. Ti yeeyo. Hiyo n’axinna. Nihaana olipiheryana mmosa ni mukhw’awe. Hiyo ninniphavelana mmosa ni mukhw’awe.

106 Vano nkawehani. Sawuli aahitthikela ottuli, ni onrowa iwe. Owo, Muluku, aahiipithiha Ekhoove Awe wa yoowo. Vano owo khurowa waakohakoha maprofeta. Maprofeta khurowa khweeherya olaleerya, vano Muluku khumaala, khuhivaha yoowoona. Profeta khukhuma, khwira, “Nkinwerya. Nnari. Owo khokhimenrye hat’etthu ya nyuwo.”

107 Ahe, vano owo khwira, “Pwiya, mukivahe yooloha.” Ohiyu p’uhiyu, hata yooloha khiyaarwa.

108 Vano owo khurwa wa Urimi Tumimi, nto khwira, “O Muluku! Kihehererya ni maprofeta, kihehererya moolohani, vano Nyuwo mukikhaliherye. Munimwiira?” Khuthikila, hata Waarya khiwaaverunya nnakhala.

109 Vano owo khimurowela mukhwiri, a vathi, oohononeya. Nto owo khimurowela, khurwa aipurulaka ni khwiivirikanyiha. Nto mukhwiri ula onrowa wihana erooho ya Samuweli.

110 Vano, koosuwela enuupuwel’anyu. Anci-ene yiirale, “Ole khaari Samuweli.” Masi Bibilia ohimnye wira aari Samuweli, ni aari Samuweli. Ti yootikiniha moota eniiwiw’aya yeeyo, kehiyo? Masi ole aari Samuweli. Bibilia ohimnye wira aari yoowo.

111 Ni mukhwiri ule aaniwerya omwihana, n’uwo aamwiihanne Samuweli. Nto Samuweli aari nipuro nikina, masi aanisuwela etthu yaakhumelela, ni nlelo aaphwanyaneya ni mukhumi awe wa profeta mwa yoowo. Tivo, munna, mwakhwa, khamukhwiye, munikhala nipuro nlo, nipuro nikina.

112 Mukihiye keemele minuutu mmosa paahi, wira kilakiherye oxutta nno s’axetwani vakhani paahi. Owo aari xetwani, masi aanikwanyana ni olumwenku wa irooho. Vano, olelo, aakhala anamakoha minepa anci-ene ansuwela orateenexa sa olumwenku wa muroohoni waavikana atthu aniihimya okhala aKristu, nnya ole aari xetwani. Okathi wa Bibilia yaari etthu emosaru yeeyo.

113 Okathi Yesu aary’awe muumu elapo ya vathi, yaahikhala mapurusooore ale n’asuweli n’awiixuttihi, amosa amosa oorattexa yaakhanle, yaakhumme oseminaariyu sooreerexa ovikana sikhany’ahu okumiheryaka olelo. Ni oowaarya, alopwana oosuweliwa, awo yaahaana okhala. muLevi aphwanyiwari, aahaana ophwanyiwa oohittheke, naxariya mwa khula enamuna. Nto nnakhala vo mutth’uwo khaasuwela sa Muluku onvikana namarokolo onsuwel’awe sa ixapattho sa muxeeluni. Okathi Yesu orwiiy’awe, owo aahivonya omusuwela Yoowo, khumwiihana Yesu “xetwani.” Owo khwira, “Owo ti Pelizepuli, mukhulupale a xetwani.” Eyo ekeekhahi?

114 Nto va khurwa muthinto wa xetwani wookhalaxa wa vathi, aamutthunkwe mulopwana mmosa omahiye wu, ni itthu sothene, nto awo khumwiihana. Xetwani yoowo mmansawe khwira, “Hiyo noosuwela Ole Nyuwo mukhanly’anyu. Nyuwo mwa Mwaana a Muluku, Ole Oowaarya.” Eyo ekeekhahi? Akhwiri athiyana n’alopwana, axetwani, yaahimusuwela Owo okhala Mwaana a Muluku; nave alaleyi oosoma, a oseminaariyu ya teoloxiyya yaamusuwenle Owo okhala Pelizepuli. T’ani aarina exariya, xetwani wala mulaleyi? Xetwani t’arina. Nto, munna, khevirikanne vanci-ene olelo. Awo khansuwela owerya wa Muluku.

115 Khivancala musomelo xeeni murin'anyu, nyuwo pooti wiikhanyereriha wiixutta. Muluku khonikhala mwa moolumo maalupale. Muluku onkhala mmurimani mwa exariya. Nyuwo pooti weemela va, olavula moolumo maalupale, ntoko kaahiki exeeni, eyo khenookhuveelihani wa Muluku. Nyuwo pooti ovenya weeteetela moota w'otthikela mutthaka anyu n'uhimya itthu iya, eyo khenookhuveelihani wa Muluku. Nyuwo pooti omwiixutta tisiyonaariyu mpakha orupa ni mmosa, nave nlelo khiyaarowa wookhuveelihani wa Muluku. Murima wowiiyeviha, woowiivaha, mwa oyeva, t'onooruhani wa Muluku. Vano eyo ekeekhai. Amen! Murima wowiiyeviha, Muluku onnimusivela. Vano, khivancala sinto khamummusuwela ABC anyu, eyo khenvirikana etthu. Murima wo wiiveviha paahi! Muluku onkhala mwa murima wo wiiveviha; kahi moosomani, kahi muxikola, kahi mwa teoloxiia, iseminaariyu, kahi mapuro ala othene oohiyana-hiyana; kahi mwa moolumo maalupale, wala kahi mapuro oolokaxa. Muluku onkhala mmurimani mwa mutthu. Nto mwaaweryaka-ru wiikhaliha ooyevaxa, oowiiyeviha, munoowerya okhala muulupale vamaithoni va Muluku.

116 Mukihiye kiwooniheryeni etthu. Kinnoona wira imatta sanyu ti soosareya etriku nno. Waamuru woosareya etriku kweekwe onimuurama. Erintta yaamukhaani enimwiiweliha vale, ni wiisinnuwiha ntoko ensuwela itthu sothene, kherina etthu waamuru. Ti siiso enkhal'aya n'attu ala anci-ene anuupuwela wira aakhalana sothene mmuruni mwaya, ni hat'etthu mmurimani, nave. Muru wooreera murima onimuurama wa Owerya, omusuwela Yesu Kristu ntoko Mwaana a Muluku, ni waamini miteko Sawe.

117 “Ni Owo mmosaru, nsana.” Oh, awo annimusuwela Owo, vekeekhai, mwa moonelo w'ehantisi. Masi kehiyo etthu y'ehantisi. Atthu anoovenya ni wira, “Oh, kinnimwaamini Pentekosite, okathi waarin'aya omwaraxiwa wuulupale n'itthu siiso,” n'upintari mooro. Mutthu oriiriwe khonviihiwa ni mooro woopintariwa. Mooro woopintariwa khoniviha. Ti yeeyo awo yaary'aya. Exeeni olelo, vakhala wira Owo mmosaru nsana, olelo ni mahiku othene? Owo mooro woopintariwa. Mutthu onihalela okhwa mwaha w'oriirya, oniira, “Nkawehani mooro ole muulupale opattihwiwe.” Vano, owo khommuvihaha mutthu.

118 Etthu yiirans'aya oPentekositeni, etthu awo yaarinas'aya mwa Waataana woopacerya, hiyo nookhalana olelo! Nto Muluku alokiheryaka-ru etthu ene, ni Ekereja khukhala vamosa, Okuxiwa onimoorwa. Masi khaninwerya okhalana waamini w'ovoniha wa Muluku, vaatepaxa wa Okuxiwa, okhala wira hiyo othene nri ootepanyiwa, mmosa enamuna *ela* nto mmosa enamuna *ele*. “Totori *Lexe ni lexe* ohimmye wira yaari *ela*. Ahe, mulaleyi aka ohimmye wira Owo aari *Ila*.”

¹¹⁹ Okathi vakhani ovinre, muthiyana mmosa iirale, “Ale anamoototha paahi.” Khwira, “Namukuttho aka okihimenrye siiso.” Kaatthuna wira namukuttho awe arwe va emaara emosa, naamoona t’ani okhanle namoototha. Ayo. Nnimoona t’ani okhanle namoototha. Murwe mweererye.

¹²⁰ Va woohikhala khalayi, oHarlingen, Texas, naarina muteko wookokhorela weiwe. Ni yaarina mapawe maalupale, mapuro othene vasulu va ikaaro ohiy’ule okathi waaronw’aka weiwo, yaahimya wira FBI aari weiwe wira akoonelihe ntoko namoototha. Vano mwaaruusi mmosa aahivonihiwa oTexas wu nipuro nlo. Owo aari osulu iwe saana, ni, miyo—miyo kinoona wira, ikilomo soophiyaka ekonto emosa ni imiya thanu na mosa, osulu wu waattamela oPanhandle. Nto ela waari ohitto wu oHarlingen, omukaanoni wu. Munna Baxter khurwa, khwira, “Munna Branham,” khwira, “khenatoko wooniwa evitikavitika ntoko ohitto iwe, atthu oophiyaka ikonto xexe wala thanu.” Ni khwira, “Vano nto, mapuro othene, FBI onoorowa woovarani vaplataforma olelo ohiyu, owoonelihi.”

Miyo khwira, “Ahe, vekeekhai kinnitteeliwa murima mwaha wa yeeyo.”

¹²¹ Khwira, “Moosuwela mwaaruusi ule ovonihiwe ohiyu ule?”

¹²² Miyo kaarwa owaani kikhumaka . . . kivolowaka musaala mwaka. Khwiiwa etthu yinlaka, nto khuwehaweha. Koono wira khino ookhala aatupheliwe. Aari mwaaruusi mmosa. Vano miyo khuweha ottuli. Miyo khwira . . . Nto khuhokolowa, khwira, “Exeeni ekhumelenle, mwaaruusi?” Vano yaari axiruusi anli yeemelanse vale, oophiyaka iyaakha, muloko ni thanu na piili ni muloko ni thanu na tthaar, khula mmosa, epatikhanne mmosa ni mukhw’awe, anlasaka.

¹²³ Khwira, “Munna Branham!” Miyo khusuwela nto wira yaanikisuwela. Khwira, “Hiyo, miyo koomuruuha mpakha va.” Khwira, “Owo ohaana orowa empa y’anamukhw’anepa.” Nto mwaaruusi uwo aari vamuthukumanoni vaka oLubbock, Texas. Nto khwira, “Miyo kaahisuwela wira kaaphiyenrye omuruuha va ni wira nyuwo mwaamurowa omuvekelela, kinnaamini wira Muluku onoomuvoniha.”

¹²⁴ Ahe, miyo khuupuwela, “Waamini xeeni!” Nto miyo khwira, “Ahe, vano, munna, mmuruuheke . . .” Nto okathi ene yoole miyo khwira, “Nyuwo murwanse nno n’ikaaro ya ncano, kahi siiso?”

Khwira, “Ayo!”

Nto miyo khwira, “Ame anyu t’orakala.”

Owo khwira, “Ti siiso.”

Miyo khwira, “Muniira mpantta wa ekereja Metotista.”

Owo khwira, “Eyo ekeekhaii mara.”

125 Nto miyo khwira, “Murwaaka mphironi, mwaahanle opittuwa. Nyuwo ni mwaaruusi ula mwaamutheyasa okathi mwaavir’anyu nipuro nimosa waari nuusu kokotto ni nuusu piriniisi, ni nyuwo mwaamukottoopa.”

Owo khwira, “Munna Branham, eyo ekeekhai!”

Miyo khwira, “Vano, SIISO ANIHIMYA T’APWIYA, mwaaruusi uwo oovonihiwa.”

126 Mmealoni mwaya aamwaraxela mooro mpooma, aaleelaka athu othene, ahimyaka yeeyo. Vekeekhai, owo khaasuveliwa iwe, sinto aahitoko okhala mukhalelo yoole wala nnari. Vano nto nihiku nlo miyo. . . Munna Baxter khwira, “Munna Branham,” khwira, “axiruusi ale arisa iwe atthokihhasaka mirupa saya.” N’ila etthu emosa owo ahaasuwenly’awe wira kaanisuwela. Musurukhu ahu waahivukuwa saana. Miyo hata khuhimuhiya olavula yeeyo. Masi mmosa w’axiruusi ale aahihela itoolare imiya thanu na xexe mwa so—soovaha mme ohiyu umosa ole ohinatthi, khuroiha musurukhu ule osulu iwe. Vano, owo khani, owo khonsuwela eyo mpakha olelo, masi miyo kaanisuwela. Munnona? Wira miyo. . . Muluku aahikileela wira yaamukhala saana.

127 Nto Munna Baxter khwira, “Munna Branham,” khwira, “vanreerela mukihye kithukumanye vakhani.” Khwira, “Amosa amosa w’anamavoniha a Muluku ala nno yaari n’awo khareere okuxa w’athu ala.”

128 Miyo khwira, “Hat’etthu. Nnari, mulopwana. Khamunrowa wira yeeyo. Munna Baxter, mwaasokhaka-ru musurukhu siiso, ti vaavo nyuwo ni miyo onvahan’ahu matata mmosa ni mukhw’awe ntoko axinna, kinoorowa meekh’aka. Munnona?” Miyo khwira, “Muhiireke siiso.” Miyo khwira, “Muluku ookhalana inyompe vasulu va miyaako ekonto emosa, ni itthu sothene ti Sawawe. Miyo k’Awawe. Owo onookikhapelela.”

Owo khwira, “Vaareera.”

129 Nto ohiyu ene yoole owo khwira, “Munna Branham, nkawehani va. Mutthu. . . Nkawehani va! Yookhala evilope va, ehirina hata nsina vasulu, erina musurukhu wa paphelo thanu na maxexe sa itoolare emiya khula emosa. Yoowo ene nimphavel’ahu wira niithokihe.”

Miyo khwira, “Munna Baxter.”

Owo khwira, “Mukilevelele.”

130 Vano nto kaahisuwela wira aari mwaaruusi yoole. Vano nto—nto mmealoni mwaya, Munna Baxter khwira, “Munna Branham, awo arisa ohitto iwe ekhunasaka ikuwo saya, yinlasaka.”

Miyo khwira, “Exeeni ekhumlenle?”

Khwira, “Vanreerela mukhuruwele mwawoone.”

¹³¹ Miyo khukhuruwela mpakha empa yaaris'aya. Miyo khwira, "Empa xeeni aris'aya-mo?" Miyo khurowa iwe khumana mukhora. Khuwiiwa yinlasaka. Miyo khumana mukhora, nto mwaaruusi khurwa vamukhora, owo khwira, "Oh, Munna Branham, mukilevelele." Owo khwira, "Kihoophwanyhani mulattu ula wothene."

Miyo khwira, "Mulattu? Exeeni ekhumelenle murokor'aka?"

Owo khwira, "Oh, koomwiiriha FBI woottharattharani."

Nto miyo khwira, "Oh, ekeekhaii iyo?"

¹³² Khwira, "Ayo." Khwira, "Kinoona wira nkireere ohimya onamoona olelo opooma, ni itthu sothene."

Miyo khwira, "Nnari."

¹³³ Nto owo khwira, "Munna Branham, FBI ori iwe, ori iwe, onrowa owoonelihani olelo ohiyu."

¹³⁴ Miyo khwira, "Ahe, vakhala—vakhala wira kiniira etthu yoonanara, kinniphavela woonelihiwa. Munnona?" Miyo khwira, "Vekeekhai. Vakhala wira olaleya Ehapari yooreera vannitthuneya woonelihiwa, vaareera, yiiriweke. Munnona?" Miyo khwira, "Miyo—miyo—miyo kinkhala mwaha wa Bibilia ola, ni ele Bibilia ola ehinihimy'awe. . . Ola ti mwaakiheryo aka, vaava va. Munnona?" Nto miyo khwira, nto owo. . .

Owo khwira, "Ahe," khwira, "mukilevelele mwaha wo wira etthu kiiraly'aka."

Miyo khwira, "Khamwiirale hat'etthu, murokor'aka."

Owo khwira, "Ahe, khamunoova orowa weiwe?"

Nto miyo khwira, "Nnari."

Owo khwira, "Ahe, FBI ori weiwe."

¹³⁵ Miyo khwira, "Ahe, yootoko wiiraneya awo orwa vamuthukumanoni vaka khalayi vano khoopowa." Miyo khwira, "Mwenye Al Farrar. . ."

¹³⁶ Kapitawu Al Farrar, anci-ene a nyuwo moosuwela orukunxa wawe murima oTacoma iwe, Washington, ooponwe, weiwe iwe mukaleriia w'oniniha ipholovolo. Aarwiiye vamuthukumanoni, owo khwira, "Koomutthara mulopwan'ola iyaakha piili. Ni khwiiwa ohimmwa sa musurukhu, ni miyo kooweha, khurowa mapuro othene." Ni khwira, "Eyo Ekeekhaii, khamunimwiiwa namathipelela ohiy'ula, muniwa Ekeekhaii." Khwira, "Mmosa w'axilopwana a mwaalano w'amapilisa, kaamurumm'aka meetiku mmosa omuwaha mwan'awe khunveleeliha wira avire muliinyani mwa mavekelo," nto khwira, "mwaan'owo aahileeliwa oratteene exeeni yaari mukattyamiho awe, ni etthu yaamukhumelenle. Nto khwira, 'Muhina mwa mahiku mathanu na mararu onootthikela oxikola, mwaha wa nanttethe.'" Nto khwira, "Nihiku na namathanu ni mararu mwan'owo aahirowa oxikola." Khwira, "Koomutthara iyaakha piili,"

ohoolo w'atthu ikonto muloko. Vale eri yothene...Vale eri elatarato ya yeeyo, muthukumano w'oSettle, mu—muliivuruni mwanyu. Owo khwira, “Kintthuna wira nyuwo othene musuwele wira khamunimwiiwa namawoka a etiini. Muniwa Ekeekhaii.” Kapitawu Al Farrar. Nto mmeeloni mwaya miyo khumweettiherya wa Muluku, nto owo khwaakhela opatiiso wa Eroho Yowarya, okaleriia w'oniniha epholovolo, wu nipuro nimosa nulupale wu.

Miyo khwira, “Khino mulopwan'ola onimwiira siiso.”

Nto owo khwira, “Nyuwu munimoova orowa wu?”

137 Miyo khwira, “Woova? Vano, vekeekhai nnari. Vekeekhai nnari. Kaarowa woovela exeeni Muluku akirumme-ene wira kiire? Ti Yoowo onwana ekhotto ene, kahi miyo.” Vano miyo khwira, “Vano, kintthuna wira nyuwo othene mususe.” Vano nto . . .

138 Hiyo khurowa omuthukumanoni ohiy'ule, nipuro nlo naahisareiwa. Vano mulipa ookhapelela vale khurwa, khwira, “Reverendu Branham, kihaaliva anamwane muloko aMeexiku.” Khwira, “Nkawehani va, ‘Reverendu Branham onimoonelihiwa olelo ohiyu ni FBI, namathipelela a etiini,’” wala etthu ekina ntoko yeeyo. Ni khwira, “Eri va khula emosa wa ikaaro iye. Okumiha . . .” Khwira, “Kihaaliva anamwane muloko aMeexiku, anrowa okumiha sothene apwehe nno.” Khwira, “Oh, kinoona ntoko vaakhanle wira kaaniwerya onvara mutth'ule!”

139 Miyo khwira, “Muhivelavele, mulopwana. Muluku onoomuvara, moone.” Miyo khwira, “Mmuhiye paahi.”

140 Vano owo khurwa. Nto ohiyu yoole vaphiyaly'ahu, nkinkhakhala kiliyalaka, khuvolowa vapuwani. Miyo . . . Munna Baxter khwiipa *Waamini Paahi*. Owo khwira, “Vano, Munna Branham onihimya wira ohiy'ula nikhume mpaani mu.” Khwira, “Miyo kinrowa epantte y'ottuli kakilaathi.” Owo khwira, “Awo anthuna omooneliha olelo ohiyu vaplataforma va.” Owo khwira, “Miyo koomoona mukhottoni sinci-ene soolipa, khumoona Muluku okhala voopuroni wawe.” Khwira, “Miyo—miyo kinrowa ottuli kakilaathi.”

141 Miyo khuwela. Miyo khwira, “Kaamusoma artiiku mmosa va aari wira koonelihiwe olelo ohiyu vaplataforma va.” Miyo khwira, “Kintthuna wira anamuteko a FBI naanaano va erwe ekoonelihe va vaplataforma.” Miyo khwira, “Miyo keemenle va wira kaakiherye Ehapari yooreera; kintthuna murwe mukoonelihe.” Miyo khulipelela. Miyo khwira, “Khino nlelo khakhanle vaava.” Kaanisuwela vaary'aka-vo. Owo aahikooniha musaala mwaka iwe, etthu yaarowa wiiraneya, 'kihinatthi okhuma, moone. Nto miyo khwira, miyo khwira, “Khino kinoolipelela vakhani. Naamuwerya wiipa nsipo nimosa?” Vano mutthu mmosa khuwela khwiipa nsipo n'omeekha.

¹⁴² Miyo khwira, “Mwenye namuteko a FBI, muri mpaani ahiiso vate? Kinlipelela woonelihiwa. Mwaamuwerya orwa?” Khaavo aarwiiye. Miyo khukhala kiikohaka waary’awe-vo. Apwiya khukileela wira yaari exeeni ile. Yaari alaleyi anli yaathhikenle ottuli, nto miyo—miyo kaamuwehaweha. Khoona eruku emosa yooriipela yiithomeiye vanlothoni. Miyo khusuwela yaary’aya-vo. Miyo khuweha vale, khweetta erowaka osulu khurowa mukaleriia siisa sa. Mulopwana mmosa aawanre efaato yooripelela, mmosa yoottweelela.

¹⁴³ Miyo khwira, “Apatthani, khuuvo hata FBI. FBI orina naata xeeni n’umulaleerya Bibilia?” Miyo khwira, “Vekeekhai nnari. Khayaari anamuteko anli a FBI wira ekoonelihe. Masi, va t’uri wooneliha wene, awo akilaathanse vale osulu iwe, alaleyi ale anli vaavo vo.” Vano awo khuurama. Miyo khwira, “Muhuurame siiso.” Nto anli w’aTexa ale aalupale yaarowa owelasa vaavale wira yaavare. Miyo khwira, “Nnari, axinna, ola kahi mwaha w’erutthu n’iphome, mukhale oomaala paahi. Muluku onookhapelela.”

¹⁴⁴ Miyo khwira, “Vano, axinna, nkawehani, mury’ene osulu weiwo, nwehe epantt’ila nno.” Miyo khwira, “Vakhala... Nyuwo muhimmye wira miyo ka Simoni namaxiitta, orina okhwiri, wira kaamwaalavalava athhu,” Miyo khwira, “Vakhala wira ka Simoni namaxiitta, weso nyuwo mw’athu a Muluku. Vano mukhuruwele vaplataforma va. Nto miyo kakhala Simoni namaxiitta, Muluku akimoroxe kikhwe. Nto kakhala profeta a Muluku, murwe Muluku oomoroxeni mukhwe. Vano ninimoona t’ani ori eekeekhai ni oovonya. Vano nyuwo mukhuruwe. Ninimwiipa esipo.” Awo khukhumela ota w’emp’ele, ni khinnawooneke-tho okhuma vaavo. Munnona? Miyo khwira, “Murwe. Kakhala Simoni namaxiitta, Muluku akimoroxe kikhwe. Nto miyo kakhala profeta a Muluku, weso Muluku onimoomoroxani mukhwe mwarwa vaplataforma va. Miyo kakhala eekeekhai vamaithoni va Muluku, Muluku onimoohiyani mukhwe vaplataforma va.” Awo yaanisuwela saana. Eyo ekeekhai. Awo yaanisuwela saana. Yaarimwiiwa sa mapuro makina. Ti yeeyo. Tivo muhikhalakhale muupuwelaka wira Muluku kahiyotho Muluku. Owo onnaakhula.

¹⁴⁵ Vano, mukhwiri ula a wEndori, owo aahiihana erooho ya Samuweli. Ni Sawuli aahilavula ni Samuweli. Vano, nyuwo pooti ophavela osuwela vaaweryaneya sayi wira yeeyo. Khivanweryaneya wiiriwa olelo. Nnari, mulopwana. Okhala wira, ephome ya inyompe ni ipuri yaawehererya paahi okathi w’omalihiriwa. Okathi mutthu aakhw’awe mahiku ale... Alaleyi, mukikhaliherye moona wira Eyo ti yoolikana. Okathi mutthu aakhw’awe, owo aakhwa vathi va eliveryo ya mwaaxinama, nto munep’awe waarowa oParatiiso. Nto owo aakhala weiwo mpakha ele, ni—Nihiku no Woopoliwa. Nto munep’awe waari memmo.

146 Mukihiye kikwerethe elatarato yaamukhaani va. Akavi amusomme artiiku aka, ahiiso artiiku olempwale mwaha wa miyo mu *Reader's Digest* va, ntoko Outubro, yookhumela ya Novembro? Vaareera. Mooweha moota yaary'aya yeeyo? Mooweha wira, isumana soophiyaka piili wala tthaaru eyo ehinatthi, namakoha minep'ola oosuwelaxiwa nno ooniheriwe okhuma khalayi, owo, Muhano Piper. Ookhala mutthu otonko omusoma yoowo, artiiku a Muhano Piper mu *Reader's Digest*? Kahi yootikiniha moota irooho iye piili. . .

147 Okathi mukavi kirin'aka? Vakhani paahi. Kooviriha minuutu miloko miili, kihaana waakuva tu. Koosuwela wira muhaana. . . Nkawehani, kileveleliwe minuutu mmosa.

148 Moosuwela, ookhala—ookhala oowootha. Yookhala y'ekeekhai ni yoowootha ya itthu sothene. Koovahanru etoolare emosa, ni wira, "Ela etoolare yooreera?" Nto nyuwo mwaweha, yaahaana olattana saana n'itoolare y'ekeekhai ahiiso khamwaarowa waamini. Eyo ekeekhai? Tivo ohaana okhala otakiha wooloka.

149 Nto vakhala wira Yesu oohimya wira irooho soopiili mahiku ookiserya saarowa okhala soolattanexa mpakha saarow'aya omoototha ole Oothanliwa vaaweryaneyya, athu anatiini. Vano muupuwele. Vano, khiivo etthu iwe mooriirya mme- . . . okh- . . . sooriya, sookhaleleya. Ota awo anooneya ntoko oothunku, mone. Masi irooho iya piili, irooho s'ekeekhai, saarowa okhala soolikana mpakha saarow'aya omootottha ole Oothanliwa, moota saarow'aya ovaraka muteko nno ni nno mahiku ookiserya. Yesu oohimya yeeyo? Oohimya.

150 Vano nwehe, apatthani, kinrowa wookwerethelani elatarato yaamukhaani. Kintthuna wira nwehe va minuutu mmosa paahi. Ni mukiwiriyanee voohihyererya, 'okhala wira kinrowa woohimeeryani nlikanyiho, vano nto munimoona.

151 Vano, mu *Reader's Digest*, mwaahilempwa mme, miyo kaaphwanyaneyya weiwe, naarina athu ikonto piili n'imiya thanu na piili naaweherery'ahu wira avekeleliwe, yaaphwanyaneyya vale. Nyuwo moomusoma artiiku. Vano mulopwana mmosa khurwa akhumaka oCanada, ni aahikhalana mwanamwane mmosa mwaamulopwana aakhanle oMayo ni John Hopkins, eretta emosa yoowooopiha ya m'ottooporeni yuumiha matat'awe so, ni yuumiha metto sawe vathi. Nto khwiiriwa, "Khuuvo hata operasawu wala hat'etthu ekhanle wiiriwaka."

152 Vano khimukuxa khimuttikiherya oCanada. Owo khwira, "Nlelo nkixinttiwe." Nyuwo mookhalana yookhumela ya Novembro ya *Reader's Digest*, ni eniihaniwa mwi—mwi—*Mwiiriirya wa Donny Morton*. Vano—vano nto khwira wira owo, mme, wira mu—wira mulopwan'owo iirale, "Nlelo nkixinttiwe, okhala wira kinnimusuwela namavoniha a waamini oniihaniwa

William Branham, aakhalin'he apatthani aka anli yaari oohiwa ni oohilavula olavula ni wiiwa.”

153 Nto khulikareliwa wira ephavele osuwela vatthu kaary'aka-vo, wa—wAmerika. Nto miyo kaari oCosta Mesa, California. Ni owo artiiku, mwamusoma vale, mwiilikanyihe wira munle. Onimwiiniha murim'anyu pahi. Moota owo aaviraly'awe muhina mw'etthapwe yowuukeliwa n'ettheke, ni itthu sothene sikina, ni mwaan'owo! Owo khwira, “Phole, Donny.” Khwira, “Vano, hiyo khanixinttiwe.” Ni mwanamwan'owo khaawerya hata otheya, vaanirika, khaareere owereiwa. Khwira, “Hiyo khanixinttiwe, ninrowa onvekela Muluku. Ninoorowa wa profeta a Muluku ninvekele yoowo.”

154 Vano nto awo khuvirasa muhina mw'etthapwe. Vookiserya khuphiya iwe, ni mai awe aarwa ni yaawo, ni khiyaarinasa musurukhu woophiyerya wira erowe ni ntteeke, tivo khimuruma mai ule ohokolowa. Vano mwammiravo n'atithi awe yaahaana orwa ni karera, ni moota jaarwans'aya okhuma wu oWinnipeg, oCanada, mpakha oCosta Mesa, California. Vano khuphiyasa iwe, ehina musurukhu, ni tiithi awe onnihimya moota waarin'awe waakakhanya ifralta sawe, mwammiravo oophiyaka iyaakha thanu na piili wala thanu na tthaaru wunnuwa wawe, oohiwerya hata vakhani. Ni moota owo aarow'awe... ahaawery'awe okhalana muraarelo w'olya wala hat'etthu, ni khwira wira mwan'awe aaniwerya paahi omwiiwa alavulaka. Ni aaniwerya ohimya moota maitho awe yaaweh'aya, wira owo—owo aanitthuna otheya, moosuwela. Ni osuwela wira owo... Owo aanimuleela sooweha soohiyana-hiyana oon'awe, wAmerika.

155 Nto vaphiyaly'aya weiwo, oCalifornia, khimuleela namakhaliherya a miteko sa mikwaha, etthu aarwenly'awe woona. Owo khwira, “Murwiiye omoona a Muluku exeeni?” Ni ekoheryo yuulupale.

156 Vekeekhai, nyuwo munoowerya otthokelela etthu Amerika aahimaly'awe mwaha wa yeeyo, moone. Moone, ti siiso siry'ahu, moone, “Hiyo n'atthu oosuwelexa! Hiyo ninnisuwela sothene, moosuwela, ni khintthuneya onihimeerya hat'etthu. Nookhalana sothene soolempwa sene.” Munnona?

157 Tivo nto, vano, “A Muluku exeeni? Mukhumme wu oWinnipeg, Canada?” Vano, khooniwa wira yaari yootepexa.

158 Khula enamuna, exornaale khukuxa e—ekaaro emosa khimuhoola weiwo. Nto owo khwira, vaphiyaly'aya muliinyani, nipuro vaary'aya, ehimnye wira atthu ikonto piili ni imiya thanu na piili yaalipelela ovekeleliwa. Masi khwira, vamoonal'y'aya mwanamwan'ole oorakale-ene, ooneya ntoko oophurana, ni tiithi ule oowooniha othunku owanre-ene exapheyo, n'ekhasako awe yoothaalasa, ehimmwe wira atthu othene yaaroosusa khunvaha opuro. Okathi ophiyaly'awe vaplataforma... .

159 Ti yoovirikanya ekano waakakhanya ettikitti ya mavekelo. Mutthu ohaana orwa vamuthukumanoni khwaakhela ettikitti awe yawawe. Mwaphwanyiswa-ru muliinyani, mwaakakhanyaka ittikitti sa mavekelo ni mutthu mukina, ettikitti iyo ya mavekelo enoomala efaita. Munnona? Okhala wira muhaana orwa khwiiwa oleeliheriwa waya khusuwela moota wo waakhela. Eyo ti yawinyu. Muhimwaakheleleke mutthu mukina. Muhaana orwa waakhela mmansinyu, wira mwiwe. Mutthu mmosa muulupale khwira, “Vakhala. . .Ahe, miyo nkinaaminixa ethhu ila. Masi, khino Owo akivoniha vale, miyo. . .” Nyuwo munnona? Vano nto eyo enniruuha evitikavitika vaplataforma, vano mukumihe ethhu iyo muhinatthi ophiya vo.

160 Vano okathi mmirav'owo opaceny'awe, ahiiso tiithi awe ohoola vaplataforma, ohoolo w'atthu, Billy khunvekela ettikitti awe ya mavekelo. Owo khaarina hata emosa. Khwira, “Vano mukiswaamihi, mulopwana.” Khwira, “Muhaana olipelela.”

161 Owo khwira, “Vaareera.” Khwira, “Kinoolipelela.” Khwira, “Kinoolipelela ekwah'aka ntoko akina, weso.” Khwira, “Nkaasuwela wira kaahaana wira yeela.”

162 Vano nto miyo kaalavula ni mutthu mmosa, khwiiwa yeeyo voohiwehererya. Miyo khumoono tiithi ule arowaka, nto miyo khwira, “Exeeni yiiraneiyey?”

Owo khwira, “Owo khaarina ettikitti ya mavekelo.”

Nto Etthu emosa khukiirela, “Mmuhokoloxe.”

163 Vano miyo khwira, “Mmuruuhe nno.” Nto tiithi uwo khuwela, ni maithori emoraka wiitho wawe, vaanitthuneya omettha ireru. Nto owo—owo khuwela, nto ela t'itthu *Reader's Digest* ehimaly'aya. Munnona? Miyo khuhikoha ethhu, masi khuweha wiitho wa mwaana, khuhimya nipuro mwaan'owo aakhum'awe, ni wira aakhikhalo oKlinika Mayo, ni sothene saari mikattyamiho sawe, moota aawereiwaly'awe, n'itthu sothene.

164 Vano nto tiithi uwo khupacerya wunla, ni khupacerya orowa. Ni khwira wira khupacerya okhuma vaplataforma, khurukunuwa, owo khwira, “Eyo ekeekhaii, mulopwana.” Owo khwira, “Masi mwan'aka onookhalakhala akhalaka mukumi?”

165 Miyo khwira, “Nkikhanle ohimiyaka.” Miyo khwira, “Okathi vakhani paahi.” Miyo khoona yoowoona erwaaka. Miyo khwira, “Khamunrowa otthuna waamini ila, okhala wira Mayo's ni Hopkins oowanli ahimye wira operasawu ule khivaaweryaneya wiiriwa m'otthoopereni mme, masi kinimooleelani ethhu yo wira. Nyuwo, meelo, murowe paahi ni mwaan'ola. Muhina mwa mahiku mararu anttharelana munoorowa okumana ni muthiyana mmosa ooriipa maihi mphironi, nto muthiyan'owo onrowa wookohani exeeni enimwiira mwaan'owo. Vano nto owo onoorowa wooleelani sa tothoro mmosa a ekuluttu emosa nno onwerya opaka operasawu uwo, ni nyuwo khamunrowa otthuna waamini, okhala wira aMayo's khatthunne omuloola khwira,

'Waari woohiweryaneya wiiriwa.' Masi iwo p'ureeriwa wene mwan'inyu orin'awe, mwa owerya wa Muluku, omoriwa ikharari wa Muluku ni operasawu uwo. Vano, mwaamini vale wira miyo ka profeta Awe, murowe mwiire ntoko sinooleel'akani." Ntoko omuhelela ifiiku Ezekiya, ni siiso.

Owo khwira, owo khurukunuwa khwira, "Kooxukhuru." Khurowa.

¹⁶⁶ Khuvira mahiku manli wala oovikana, nto owo aari mphironi nihiku nimoso, nto muthiyana mmosa khumwaattamela, khwira, "Exeeni enimwiira mwan'inyu?"

¹⁶⁷ Khwira, "Orina e—eretta ya m'ottoporeni." Ni owo aanitthikela alavulaka siiso. Nto, ahe, awo—awo yoona wira yaari yootepexa otakhala, moosuwela.

¹⁶⁸ Nto owo ohimye wira muhina mwa minuutu vakhani paahi khwiiraneya etthu. Owo khwira, "Mwenye, kinnimusuwela mutthu okhanle wiiraka operasawu uwo."

¹⁶⁹ Owo khwira, "Muhano, nkawehani, Axinna Mayo aroohiya ni ahimye wira khivanweryaneya wiiriwa." Khwira, "Mulopwana mmosa nno aamuvekela mwaha wa yeeyo, oniihaniwa Munna Branham." Khwira, "Owo oomuvekelela mwanamwan'ola." Owo khwira, "Nwehererye vakhani! Ooriipa maihi, owanre ekhasako yoottweelela." Khwira, "Ti yoola." Khwira, "Ori vayi tothoro owo?" Vano owo khimuhimeerya. Khimuroiha weiwo nto tothoro khwiira operasawu, mwaan'owo khupenuwa.

¹⁷⁰ Vano, eyo ekhumme *oReader's Digest*, moone. Vano Axinna Mayo khukiihana wira ekikohakohe mwaha wa yeeyo. Khwira, "Reverendu Branham, mmwiirihale exeeni mwanamwan'ole?"

¹⁷¹ Miyo khwira, "Hat'etthu. Miyo hata nkimukwanyale. Miyo kihimye paahi ele Muluku aakihimenry'awe wira kimuleele. Mulopwan'ole khwiwelela."

¹⁷² Vano, etthu yootikiniha yaari, vaviraly'aya isumana soophiyaka piili nuumala yeeyo, kiireke isumana piili eyo ehinatthi, wala tthaaru, mu *Reader's Digest*, khino mweeri mmosa ottuli waya, artiiku a Muhano Piper aahikhuma. Vano, owo mukhwiri ooloka, wala namakoha minepa. Vano, ookhala eekeekhai, ni ookhala mutthu ontakiha. Athu arina muthiyan'owo okhuma 1897. Owo oovikana iyaakha emiya vano, oNova Yorke, oowanli aya...oohiwa ntoko nripu. *Reader's Digest*, onkuxa...Kinoona wira aakhumme miyeeri soophiyaka miili wala mmosa awaka ohinatthi; nto nyuwo munoowerya omuphwanya, wopaceryani w'ephovo. Mwenye Baxter aari ni yoowo nno nihiku nle. Kuupuwenle-ru yeeyo, kaammuvekela owo...wala kaasuwenle-ru wira kaarowa ohimya yeela, ka—kaamuwerya ophwanya. Kinoowerya ophwanya ya nyuwo. Ni erina makukhu muloko ni manli wala muloko ni maxexe. Owo aari muhano mwaneene ethhoko pure.

Nto owo khukwanyuwa nihiku nimos, ahaawaka siisaale, nto khupacerya olavula n'alipa-ookhwa. Ni yaahikhala ni muthiyan'owo mulaponi mothene, mapuro othene. Aahiroihiwa Inklateera. Khwaakakhanyiwa hata ikuwo sawe, imaara sinci-ene, wira yooniwe sinto waahikhala opahuwa n'itthu siiso, nto khuroiwa weiwe khutakiheriwa mutthu omuwanrene maaxikara wiitho, muKereku, khwiira ntoko wira aari mwInkelesi. Vano owo khimuleela sothene sa yeeyo. Nto owo—owo—owo aathuna omwiihana mmosa w'axaapar'awe yaakhwiye.

¹⁷³ Vano, etthu emosa paahi owo...Mulaponi mothene, ni va *Reader's Digest* oohimya mme, va ohiyu vakhani ovinre, wala miyeeri vakhani sivinre, wira etthu emosa wa seiyo yaahoonelihiwa. Yaari wira mulopwana mmosa apecari ntata na erooho y'ame awe, nto mmeeloni mwaya khooniheriwa mpwaro mwa milattu wa mapilisa wira owo paahi apecanri nttapwatta naamukhaani n'ekuwo. Atthu anci-ene emutakhikaha namakoha minepa! T'anamasoma ala paahi amphwanyanya mukerekhere w'ephiro, ahikhanle anamakoha minepa opacerya wene. Awo anamatakiha oowootha. Masi ookhala namakoha minepa eekeekhai.

¹⁷⁴ Ni hiyo atthu anatiini, nookhalana anamatakiha anci-ene ipantte soopiili. Vano mukhale oomaala minuutu vakhani.

¹⁷⁵ Vano nwehe, Muhano Piper owo namakoha minepa eekeekhai. Nto erevista ehimye wira, "Va yookhala etthu ekhanle okupaliwaka, wira, mutthu akhwa vale, owo khakhwiye. Owo onkhala nipuro nlo, okhala wira muthiyan'owo onnihana irooho saya khutthika n'ulavula n'atthu."

¹⁷⁶ "Vano, owo oniira exeeni, Munna Branham? Nyuwo munnaamini yeeyo?" Ayo, mulopwana. Bibilia onihimya siiso, tivo miyo kinaamini aka. Ni owo ta xetwani. Okoha minepa ethepyelo ya xetwani. Vano nwehe, vano nkaawehaseni oowanli aya.

¹⁷⁷ Vano nto nyuwo mwaahaana woona ipaphelo okisalela, nto, okathi artiiku aka okhumaly'awe voottharana ni awawe. Kahi yootikiniha wira, okathi vakhani emalelo y'okathi ehinatthi ophiya, Muluku oolavula itthu iya? Ni *Reader's Digest* onkumiheriwa mwa khula nntaava vathi v'erimu. Munnona? Nwehe, kehiyo yootikiniha wira emosa yaahithara ekina?

¹⁷⁸ Vano va sinoorwa ipaphelo, saahimya wira, "Munna Branham, eyo enooniherya wira khamuhiyo hat'etthu woohikhala namakoha minepa." Saahimya wira, "Eyo ennooniherya. Nkawehani va, nwaahimuleela muthiyan'ole vathu vaarow'awe ophwanya...Omoona muthiyan'ola?"

¹⁷⁹ Miyo khwira, "Nwehererye minuutu mmosa." Kookhalana epaphelo y'akhulupale, (kileveleliwe), wira eveleliheriwe atthu. Miyo khwira, "Moota nyuwo alaleyi munsuwel'anyu

vakhani.” Miyo khwira, “Ohiya opatisa irutthu sanyu, vantthuneya opatisiwa miyuupuwelo sanyu.” Ti yeeyo. “Nyuwo khamuneemela wira mutthokelele itthu. Khamumphavela wuupuwela.”

¹⁸⁰ Ti siiso awo yiiraly’aya mahiku makina. Awo yaanimoonna Yesu. Yaanisuwela wira Owo aaniwerya . . . Owo aanisuwela isiiri sa mmurimani mwaya. Owo aanisuwela etthu awo yiir’aya siisaale. Nto awo khwira, “Owo mukhulupale a axetwani. Owo ti Pelizepuli, nahako oolokaxa mulaponi.” Awo khayeemenle wira ephavele osuwela saana, yoone wira aari Mwaana a Muluku. Awo khayaari a erooho voophiyerya osuwela. Ti yeeyo, awo yaasomme etthu iyo vasulu-sulu. Vekeekhai, yaari wira Yesu arowe oYerusalemu, onwenle-ene mwaapuuru, ni siiso, masi awo yaaweha Orwa wa nenli.

¹⁸¹ Nto etthu emosaru olelo! Awo anweha vasulu v’etthu y’ekeekhai. Aleluya! Ti yeeyo. Koosuwela wira Muluku ori vaava, oxekuw’ola, ni koosuwela wira kinookuxa okathi anyu munci-ene, masi muhaana wona ela, mpatthani. Kaahitthikeletho owoonani, muhaana osuwela ele akhanle axetwani, muhaana osuwela ele ekhanle Ekeekhai ni ekhanle yoovonyeya. Ni ti soolattanexa, muhaana ovalaanyiha etthu ene.

¹⁸² Vano muupuwele, eyo khenrowa okhala ottaiwene iwe, etthu ottaiwenexa epantt’ila *nno* ntoko aFarisi, wala etthu ottaiwene epantt’*ile* iwe. Eri vaava va vamukhora, vakhiviru saana. Nwehe yeeyo. Vano kaakunxe-ru . . .

¹⁸³ Nrowe nikuxe myaha iyo miili. Miyo kaakunxe-ru khoovahani etoolare, naanaano va, koovan’heni-ru etoolare yoohikhala y’ekeekhai. Ninrowa ohimya ni nlikanyiho wira nwerye wona. Etthu yoopacerya mwaarow’anyu wira, mwakhalaru mutthu aankhili, mwakuxa etoolare khuweha, etthu yoopacerya, munoovaravara moone etthu epakaniiw’aya. Eyo ekeekhai? Munooweha etthu epakaniiw’aya. Munooweha esisapo aya. Etoolare y’ekeekhai khempakiwa n’epaphelo, epantte y’epaphelo ni ya seeta, moone. Nto etthu yoopacerya, muhaana oweha efaite aya. Eyo t’ithoonyeryo yoopacerya.

¹⁸⁴ Nto vano nrowe nimukuxe epantt’*ila* nno; ni naakuxe Apwiya epantti *ila* nno, ancaliwa ni hiyo.

¹⁸⁵ Vano nkawehani, etthu yoopacerya murin’anyu oweha, sothene . . . Munwehe artiiku anyu. Mwa iyaakha miloko mithanu n’itthu s’enahako awe, ni wiihana irooho s’alipaookhwa, khiivo emaara emosa otonko awe omuromola Muluku, Kristu, ovoniha wa Muluku, ovuluxiwa, Olamuliwa, wala hat’etthu. Khiivo hat’etthu woohikhala onyemula ni ololo mwa yeeyo.

¹⁸⁶ Masi epantti *ila* nno, voohihyererya enkhalala Muluku, Olamuliwa, Orwa wa Yesu, ovoniha wa Muluku, owerya wa Muluku, ovuluxiwa. Nkawehani efaite aya. Khanooniwa

anahako n'akhwiri elaleyaka Ehapari yooreera. Exeeni eniwiira athu? Wulu! Nwehe!

¹⁸⁷ Nto etthu y'ekeekhai wira, mwaatthunaka osuwela sinto etoolare y'ekeekhai wala nnari, yakhalaru yoolattanexa ni yeeyo, mukuxe mammeru aya muroihe empa ya musurukhu. Nto yakhalaru mammeru weiwo anlikana ni yeeyo, yookhala etoolare y'eparatha enliplelela yeeyo. Eyo ekeekhai?

¹⁸⁸ Ahe, nto, munna, mukuxe etthu owo iiraly'awe nto muroihe yeeyo mBibiliani, munoophwanya wira ti mukhwiri a wEndori.

¹⁸⁹ Nto mukuxe ele eri va, munoophwanya eyo, eri muLiivuruni mu Empa ya Musurukhu, "Yesu Kristu mmosaru nsana, olelo, ni mahiku othene." Vekeekhai, muteko Awe yoowo mmosaru! Owo khaaronwe n'ulolo ni ethiru n'athu. Yaari wa mureerelo, ni omukhaliherya mutthu, wira oweettiherye wa Muluku. Amen! Nkinihimerya "amen" mmansaka, masi *amen* enihimya "ekhale siiso." Ni miyo kiri. . . Miyo kinnaamini Yeeyo. Koosuwela wira Ekeekhai.

¹⁹⁰ Vano nwehe, ela eri va. Vano, voowaakuva vano, 'okhala wira nkinthuna woopisihani-tho.

¹⁹¹ Va, nrowe nikhalihe eyooniheryo yaamukhaani va, eyooniheryo yaamukhaani ya mmuruni va. Va ori muro onvira vaava va, ephiro *ela* vaava va, onvira mw'ekumini. Vano nwehe. Owo mukhulaku. Mukiwiriyanane oratteene vano, wira muhivonye wiiwa yeela. Orwaaka siisa *sa*. Vano, mukhulaku yoola mwaamukhaani va sinnikhala-mo itthu sinookhwa, nyuwo ni miyo. Vano, memmo, nrowe niwehe exeeni iyo. Nikhutha na ololo n'itthu sothene sikina, masi imaara kamosa-kamosa onnooneya waarya. Ennooneya epiphi ni iphiro, orukuneya ni mweettelo woohiloka, axetwani yaavaraka athu. Oh, awo anniwara saana, wulu, ni oolakeya saana ntoko sinweryaney'aya okhala, asomi ooratteliwa, masi nnakhala vo xetwani. Masi aakhala ayariwe vasya amphwanyaneyaya memmo.

¹⁹² Vano, athu ala mmukhulakuni mu anvariwa murima ni ipante piili soovirikana. Vano, epant'ila orowa ephiro *ela*, wookhala oraaru. Ni Epant'ila orowa ephiro *ela*, wookhala oraaru.

¹⁹³ Vano, okathi, vano voopacerya, epant'ila, ori munepa wa mulipa *ootakhala*, mutthu akhwa vale onrowa nipuro nlo khunawehererya olamuliwa. Yesu aahirowa khulaleerya minepa s'atthu saatthukweliwe memmo. Voottharana ti minepa sootakhala. Voottharana, ti xetwani omooroni. Yaawelaka, soopacerya, vano, iye siri mme iroohoo, irooho s'atthu akhwiye ahinatoko orukunxa murima. Awo anoowehererya Olamuliwa. Etthu ene emosa tu ansuwel'aya ololo n'iyee siiraly'aya.

¹⁹⁴ Vano, osulu nno, aKristu ala anvariwa murima okhuma Osulu. Nla nlikanyiho. Osulu nno yookhala Eroho ekina, Eroho Yowarya, Eroho ya Mutthu, Yesu Kristu. Eroho Yowarya, Eroho

Yowarya, envara murima Ekereja Awe mwa mukhalelo yoola w'atthu ankhwa.

¹⁹⁵ Xetwani, mwa irooho *seiya*, onnimuvara murima mutthu. Vano, nkawehani, anttharelana Malaikhaa. Voottharelana Mulukuu. Vano, khula onookhwa va onvariwa murima ni mmosa wa olumwenku iya. Munnoona enihimy'aka?

¹⁹⁶ Vano etthu muthiyan'ole iiraly'awe, owo aarookela muhina mwa mukhalelo yoowo. Vano onlavula n'atthu awo oovariwa xetwani yaari, wopaceryani, irooho sa malaikha ale yaamonre yahaarukunxale murima ottuli wopaceryani, khutthuniherya wira okhala waya ovariwe ni seiyo. Nto awo anwehererya Olamuliwa.

¹⁹⁷ Nto *ala* nno anvariwa murima ni aayariwa vasya ni Eroho ya Muluku. Ni xetwani ookhalana maprofeta awe, ni Muluku ookhalana Awawe. Munnoona entthun'aka ohimya? Ti ovariwa murima, nto ninoorowa. Muhiye ovaalanyiha. Yesu, okathi Owo aary'awe muumu elapo ya vathi. . .

¹⁹⁸ Vano, olelo, owo khonwerya okela muhina mwa mukhalelo yoowo khimukumiha naxariya mmukhaleloni memmo. Owo khonwerya wira, 'okhala wiraanaxariya khakhanle iwe yaakhalak'aya-wo, muParatiiso. Nnari, mulopwana. eParatiiso yoomalamalihiwa, okathi Ephome ya Yesu ekuxaly'aya. Nkawehani va. Wulu!

¹⁹⁹ Vaakhanle wira kaaniwerya wuupuwela moota Yesu, okathi Owo okhwi'yawe, Owo aahirowa khulaleerya minepa s'atthu saatthukweliwe. Owo okhwiye, ntoko natampi, ahisuwelaka etampi, nnya etampi ahu yaari mwa Yoowo. Vano Muluku, mwaha wa itampi Sawe, khimuroiha mookhwaani. Bibilia ohimye wira, "Owo aahirowa khulaleerya minepa."

²⁰⁰ Atthu akina aniira, "Munna Branham, nkinwerya osuwela saana." Khwira, "Yesu aahihimunwe mmurotoni mwaya. Owo aakhwiye Namathanu oxekuwa khuhihimuwa Ttiminku voosiisu, vano, Owo okhanle nihiku nimoso okhwiye."

²⁰¹ Owo aahimye wira, "Muhina m'okathi yoowo," maana Owo aahikhalana Yoolempwa emosa mBibiliiani, aawery'awe wiilipiherya-vo. Okhala wira, Davidi, mulopwana mmosa aathikenle ottuli ohoolo waya, masi aahoopowa, masi profeta vathi va muupuxeryo wa Muluku, aahihimya, "Miyonkinihiya munepa Awe mookhwaani, nnakhala nkinthuniherya Oowaarya Aka wuntta." Nto owo aahisuwela, mahiku mararu ni ohiyu, wira erutthu ile yaamukhala yowuntta. Ni Muluku aahimuhimeerya profeta, "Owo khanrowa wuntta."...?... [Nipuro vahiitthu mufiitani—Mol.]

Aleluya! Owo aakunxe Masu a Muluku. Owo aahimuxintta Satana, khula okathi, mwa Yaawo. Owo ooxintta okhwa, mwa Masu a Muluku. Aleluya! Owo ooxintta okhwa. Nto okathi awo amwiivaly'aya, Owo khukhwa, ntoko natampi, itampi saka

ni itampi sanyu mwa Yoowo, Owo aahikhuruwa, kinniwerya omoona Owo amanaka mukhor'ole iwe.

Vano minepa iye sipweteiye khurwa khwira, “Ahe, Nyuwo mw'Ani?”

²⁰² Owo khwira, “Mwahaamwiilenleni Enokhi? Mwaahaawiiwelenleni maprofeta ale akina yaalaleerya?” Awo yaahihukhummwa. “Miyo ka Mwaana a Muluku aatonko okhala. Miyo. . . Ephome Aka yoomwaraxiwa. Kinoorwa wohimeeryani, wira Miyo koomaliherya, iye saahimiyale maprofeta wira kaamurowa wira.” Khwaavira axetwani, arowaka mookhwaani, akuxaka ihulelo sa mokhwaani ni omooroni wa xetwani, khuthomeya epantte Awe, khupacerya owela ahokolowaka. Aleluya!

²⁰³ Ephiyaka oxaka voosiisu. Aleluya! Nrowe nipake eyooniheryo yaamukhaani va. Oxaka voosiisu, nookhala nikhuru nikina nimphwanyaneya nno oParatiiso. Awo kharisa weiwo vano.

²⁰⁴ Vano, nyuwo apatthani aka aalupale aKatolika munaamini olapela wa masantu. Vakhala wira munnilavula ni santu mukereja mwanyu, mutth'uwo natampii, owo ori omooroni, wala—wala onoowehererya wu olamuliwa wawe. Ni vakhala wira aari santu, ori moovuwani mwa Muluku ni khokhanle ohokolowaka. Eyo ekeekhaii. Kinniwerya wooniherya yeeyo. Ephome y'amwaanyompe khiyaattipiha etampi, masi Ephome ya Yesu yoomwalaniha itampi.

²⁰⁵ Kinniwerya omoona Yesu owela iwe weiwo, oParatiiso, ori ti mutokweene Abrahamu, Isakhi ni Yakope, n'akina weiwo, Samuweli ni othene aya akina weiwo. Kinniwerya omwiiwa Owo amanaka mukhora. [Munna Branham ommuna vapulpitu imaara thanu na mosa—Mol.] Amen! Oh, okisivela yeela. Kinnikela oratteene. . . kinnoona okhala natiini vano. Kinniwerya omoona Owo awehaka vale. Kinniwerya omwiiwa owo wira, “T'ani ari ota iwo? T'ani Awo vo?” Owo khwira, “Miyo, ola ti Abrahamu onlavula. T'ani Awo?”

²⁰⁶ “Miyo ka Osuulu w'Abrahamu.” Amen. Kinniwerya omoona Abrahamu orwa vamukhora, khuhula mukhora. Owo khwira, “Miyo ka Osuulu w'Abrahamu.”

Daniyeli khwira, “Nkawehani vale! Vale nri Nluku koonaly'aka othikiliwa vamwaako.”

²⁰⁷ Kinniwerya omwiiwa Ezekiyeli wira, “Ole vale! Miyo kaamoonale Owo, ntoko ntthupi vathi va inawu Sawe, meeku yeettaka, okathi amwaapwittipwitthi. . . emanaka ikuphi, mataakhuru, othene aya etthapaka.” Oh, kinniwerya owona athu oohiyana-hiyana oParatiiso iwe, emuwehereryaka Yoowo.

²⁰⁸ Kinniwerya omwiiwa Owo wira, “Nrowe! Nihiku nnimooxa oYerusalemu. Nihaana okhuma va. Ninrowa owela, okhala

wira nyuwo mwaaroromenle ephome y'amwanyompe ni ipuri, mulipelelaka okathi w'Ephome Aka. Masi Ephome Aka yoomwarexiwa oKalvario iwe. Miyo ka Mwaana a Muluku oowiipaka mutthu. Olokhiwa wothene wa itampi woolinvwa. Nri ephiro ahu yookhuma!" Aleluya! Avuwihwe Muluku!

209 Kinniwerya omoona Abrahamu omuvara Sara moonoo, nto awo anoorwasa va, erwaaka! Mwa Matewu 27, okathi okhumaly'awe, kinniwerya owiwa yeemenle-ene vakhani oYerusalemu iwe. Nto naanaanoru, kinniwerya omoona Kaifa n'akina yeemenle-ene mphironi, yiiraka, "Kileeliwe wira mmirav'ole oohihimuwa. Nkahimya, t'ani mutth'ule onrowa vale; mmirav'ole, mwali ule?"

210 Khayuuluvalanse-tho; ole aari Abrahamu ni Sara. Vano awo khulakaseya. Awo yaaroowehasa, "Ookhala onniwehaweha." Awo yaaniwerya olakaseya ntoko Owo aaviraly'awe muhina mw'exiri, muthinto mmosaru w'erutthu. Aleluya! Ekeekhai. Va ari maprofeta othene n'akina, yeettakasaka, ewehasaka epooma.

211 Nto Yesu khuweettiherya osulu, ahiiso osulu wa ittheneeri, mweeri, meeku, ohaakuxa ootthukweliwa, ohaavaha atthu soovaha. Yesu onikilaathi olelo moonoo woolopwana w'Atithi, oroowela iwe, khukilaathi, mpakha awanani Awe othene ekhalihwe ntthatto na inawu Sawe.

212 Nto olelo, mpatthani aka oophentiwa muKristu, axetwani anivara muteko ipantte sothene. Ni Eroho ya Muluku enimweetta oratteene, epantte ekina, wira ekhwelihe yeeyo khula okathi. Aleluya! Eyo vo. Ixornaale ni irevista n'itthu sothene sinnihimya. Awo anniwehaweha. Khanwerya woota exeeni iyo. Exeeni iyo? Olopola wa okathi muulupale wa wooniheriwa onrwa naanaano va, wa Muluku ni xetwani. Mukhale epantte ya Muluku ni mukhale oratteene murim'anyu. Amen.

213 Va woohikhala khalayi kaari oToledo, Ohio, kikhalanaka muthukumano. Kinoorowa omaliha.

214 Munnoona enihimy'aka s'axetwani? Awo anvara muteko. Awo anatiini saana, anatiini enamuna emosaru! Oh, awo annirowa okereja khula Ettiminku, annitthikela omuhimya Waamini w'Arummwa, ni wiipa Isipo sa etiini. Oh, wulu, anatiini saana ntoko sinwery'aya okhala!

"Munna Branham, muntthuna ohimya wira eyo Ekeekhai?"

215 Yaari enamuna yeeyo ya erooho yaamuthomeiye Yesu Kristu vamwiikimanyo. Nto Yesu khwira, "Nyuwo mw'atith'inyu, xetwani."

216 Vano akina aya yiirale, "Oh, Ruusiya ti nwanani a Kristu." Nnakhala! Ruusiya kahiyo nwanani a Kristu. Nwanani a Kristu onrowa okhala natiini saana mpakha vaarow'awe omoototha ole Oothanliwa vaakhanle wira vaaniweryaneya.

Muupuwele, Muluku onimukuxa mutthu Awe, masi kahi Eroho Awe. Xetwani onimukuxa mutthu awe, masi kahi eroho awe. Vano, awo arisa vo. Mwiire entthun'anyu. Miyo kinaakhula paahi mwaha w'Ekeekhai.

217 Axetwani, evaraka muteko! Nsana, kaahaahimya mukhalelo wa mw'erutthuni. Olelo, kiniwoonihani mukhalelo wa etiini, vaavo awo ankhal'aya mukhalelo wa etiini. Weiwo ary'aya wu, aniihaniwa kankuru, ni aniihana *ela ele*, ni *ekina*, masi miyo koowooniheryani, ni Bibilia, wira awo axetwani. Vano, va, olelo, awo ari-tho mwa mukhalelo wa etiini, anatiini saana, oothunku saana.

218 Nyuwo mwapacerya vale, munna, ni khuupuwela. Kayini, epacerelo ene ya yeeyo, aari mutthu natiini saana. Esawu aari mutthu natiini saana. Yuta aari mutthu natiini saana. Etiini. Kuhiyo olumwenku w'ota. Ori eriyari ene yeeyo. Nwehe yeeyo, oxutta s'axetwani! Khino ohoolo vakhani, okathi p'ukathi, pooti okela mwa yeeyo vakhani-tho. Ninoopisa.

219 Muhimulamule mutthu. Mwaaphente atthu othene. Mwaahiweryeke ophenta vamurimani vanyu, weso Kristu khakhanle ni nyuwo.

220 oToledo, Ohio, kaahikela murestaurante yaamukhaani. Kaamoolya nipuro nimoso, nipuro nimoso naamukhaani na aDunkard, nipuro naamukhaani nooreera. Awo yaari oosivela saana. Oxekuw'ole awo yaahitthuka-mo, wira erowe exikola ya Ttiminku. Nto varowaly'aya, kaahaana orowa epantte ekina y'ephiro, nipuro nimoso naamukhaani na molumwenkuni, nto miyo khukela memmo. Ni koosuwela wira omuttikha cuuku ti yoohitthariha malamulo Ohio. Nto va aari Mupilisa a Estaatu aamupatinkhe mwali mmosa, ni ntata nawe nry'ene va vatthirima vawe, amuttikhaka cuuku a mmaakinani. Malamulo a mittetthe sahu n'ilapo, othene aahononeya. Wooniha othunku!

221 Kimmuroromela Kristu Mwala woolipa, vaavo ti vanlip'aka, etthaya ekina mihaava sinkomowa. Khehanle etthu. Ti yeeyo.

222 Miyo khuweha ottuli iwe, aahikhala mwamuthiyana mmosa ooreera, alakela mw'emiravo awe, iyaakha, muloko ni thanu na tthaaru, muloko ni thanu na xexe. Nto etthu yiiras'aya, aximiravo ale ottuli iwe erukurenrye meesa, yaari yootakhala. Miyo khukilaathi vaavale. Nto vano otuthuwa waka, kikilanthene ene vaava va vaavo aarwiye muthiyana mmosa, khwira, "Munnitthuna okilaathi?"

Miyo khwira, "Kooxukhuru. Kaatthuna olya voosiisu."

223 Vano akilanthene ene vakhaterani, va aaphwanyaneya muhano mmosa mutokweene, oowunnuwa ntoko ame aka, a iyaakha miloko mithanu ni thanu, miloko mithanu ni tthaaru. Owo aawanre ikuwo seiya sikhaani soohiloka sinwariwa.

224 Sinihimmwa wira ti soovira etheku. Siyensiya oniira, “Nyuwo muroovahuwasa.” Vekeekhai, kehiyo. Nyuwo munthuna wiisooniha epwitipwiti paahi. Ti yoowuliha muru, ohittittimiheya. Muhano khonwara iyo. Muthiyana onoowara, masi muhano nnari.

225 Vano nto, tivo nto awo. . .owo aari vaavo, akilanthene vale. Erutthu awe yowooniha othunku yaari yoowolowaseya. Owo ahikhalana muthinto ole wa manikuure ooripelelexa, khino eniihaniwa xeeni, owanoni wawe. Maihi oometthiwa vakhani ntoko mulopwana, othene oothererihwi; yeeyo Bibilia ohimaly’awe, wira onkhala ohittittimiheya. Ni muthiyana, wira mulopwana. . .

226 Bibilia onihimya wira, muthiyana amettha maihi awe, mulopwana ookhalana ehaakhi y’omuhiya amwalanaka, okhala wira owo kahi ooromeleya wa yoowo. Nihaana orwa omulaleerya Bibilia va nihiku nlo. Khwira, “Owo amettha maihi awe, khonimuttittimiha iy’awe.” Owo akhala oohittittimiha, aahaana omwalaniwa. Khamukhanle omuthela mukina, masi pooti omuhiya. Whish! Wulu, eyo, eyo yaari yoolipa, kinniweya woona siiso. Masi eyo Ekeekhai.

227 Oh, yaanikhalaka wira, hiyo naanikhalanaka eyo eriyari y’ale jaarina Eroho Yowarya, masi nirooresa iwalelo. Munna mmosa mutokweene aaniiraka, “Hiyo nirooresa iwalelo, nirooresa iwalelo, nirimwiisakaleliha ni etampi. Hiyo nirooresa iwalelo, ipwittipwitthi khutthyawa, masi ipuri sikenle sayi?” Murooresa iwalelo. Owo ti mulattu ene. Murooresa iwalelo, olumwenku ni ekereja khutakanxana. Siiso ntoko aMoabi n’akina, ni Palaamu, ni moota aathelihans’awe eriyari aya, vekeekhai etthu emosaru olelo. Ni ekereja ti yoonanarasa yothene, ni okathi wa Pentekosite ti okathi wa Lawotiseya, yoowo onkhala wookuttihiwa, ni onoorapheiwa mwaano mwa Muluku. Ni ota wa nikhuru nothene, Muluku oniihana ole ohanle, khimukuxa Yoowo amuroihaka Owaani, vekeekhai ti yeeyo, vekeekhai, muhina mwa ohihimuwa.

228 Nto owo aaphwanyaneya vale, okilanthene, oopintari owanoni wiitho wawe wothene, ni wothene waari-wo siiso. Ni aahikhalana etthu ila yooriipa va mmaithoni mwawe mothene, ni aamuviheriwa, ni yaanimora. Ni oowooniha othunku alakela aahikhalana axisulu. Ni aakilanthene vale n’axilopwana anli atokweene, nto mmosa aya aarina ekuwo yuulupale ya mmakhatani muxikoni mwawe, ni eyo mweeri wa Junho, okilanthene vale. Vano owo khuvenya, ni aamuwurya vakhani, ni muthiyana aamuwurya, nave. Ni owo aawehaweha vale.

229 Miyo khuupuwela, “O Muluku! Muluku, xeeni Nyuwo ohikumihaka etthu ila mmaaphani? Mwaha wa xeeni Nyuwo? Sharoni aka mwaamukhaani. . .Mwan’aka mwaamukhaani,

Sara aka mwaamukhaani ni Rebekah aka mwaamukhaani ahaana oleliwa muhina mwa nloko nenle, ni ephiyerye okumana n'itthu ntoko ele?" Miyo khuupuwela, "Nkawehani nno muparki mu ni itthu siiso, ni etthu eniiraneya." Miyo khuupuwela, "O Muluku! Oh, vaareera Nyuwo omukuxa Sharon vakhala wira waari otthuna Wanyu. Rebekah aka mwaamukhaani ni mwaamukhaani—Sara mwaamukhaani ahaana oleliwa ni etthu ntoko yeele?" Yeeyo, ni atthu ala aniwiihana... aniya mukoraaleni ni sothene. Nto miyo khuupuwela, "Kahi yoowuliha muru?" Miyo khuupuwela, "Muluku, vanweryaneya sayi exariya Anyu Yooreera ovilela yeeyo? Enkhala ntoko oviruwa Wanyu wa xariya waamurowa vale opwe—opwexakase nipuro nla."

²³⁰ Vano kaahiiwa Nlaikha n'Apwiya, khwira, "Mususerye epantte emosa." Miyo khurowa mpakha vaavo. Nto okathi Nlo nimanly'aya olavula ni miyo, kaahiisoono ntoko mutthu oovirikana. "Munimulamulelani yoowo?"

Miyo khwira, "Nkawehani ile, enamuna siry'awe." Nto va t'ile Nlo...

²³¹ Kaahikhalana yoowoona. Koonale olumwenku ntoko *ola*, woovilikeya, olumwenku mukina. Masi olumwenku ula *va*, waahikhalana ekhweyi yaarukurerya yoowo, nto eyo yaari Ephome ya Kristu enkhapelela wa oviruwa wa Muluku. Owo khakhanle oweha ovikana yeeyo, Owo—Owo aamuhonona etthu ene naanaano va, okhala wira Owo aahimye wira, "Nihiku ninrow'anyu olya, nihiku nenlo munookhwa." Tivo Owo aamwiira.

²³² Vano kaahuupuwela sa. Khwiisoono yoomi. Kinamwi kahirale yeeyo, masi kaari natampi, khula enamuna. Vano nto Ephome ya Yesu Kristu eniira ntoko eparaxooke wa hiyo. Munnona? Wira, okathi waatthek'aka, itampi saka saamukumula Yoowo n'uvulaliha muru Awe wooreerexa, vano miyo kaaniwerya woona maithori ni Ephome simoraka. "Mmulevelele, Tithi, khonsuwela eniir'awe." Ni kaaniira etthu ekina vano yaakumula Yeeyo. "Mmulevelele, Tithi."

²³³ Kaavinre-ru wa Yoowo, kaamwiira kitoloxiwe-ene. Ni kahaatonko okupali mahala Awe, ni munep'aka khuvira ovikanaka yeeyo, kaamwiira kilamuliwe-ene. Kookhootha. Khiivo enihaleela ehikhanle olamuliwa. Olamuliwa, koomala olamuliwa. Muluku iirale, "Nihiku ninrow'anyu olya, nihiku nenlo munookhwa." Moolamuliwa saana. Ela ehice y'olamuliwa oxekuw'ola, mweettelo anyu wa Kristu.

²³⁴ Vano nto miyo khuupuwela, "Ayo, ti yeeyo." Vano kaahoona nihiku nimosa waapuruleiy'aka mpakha wa Yoowo. Kaahoona eliivuru aka ya khalayi yaaphwanyaneya vale, natampi, mme saaphwanyaneya sothene memmo. Kaahoona wira itampi

saka ti saairiha yeeyo, nto miyo khwira, “Pwiya, Nyuwo munookilevelela?”

²³⁵ Khukuxa ntata Nawe mpararini mw’Awe, khuvara Ephome vakhani, khulepa vasulu, khwira, “Ooleveleliwa.” Khurihela mphareya m’oliyala, wira ohuupuwele-tho. Saahirimeela khuluwuru! Owo khwira, “Miyo kinnoolevelelani, masi nyuwo munimulamula ole.”

Eyo yaahirukunxa muupuwelo aka. Miyo khwira, “Pwiya, mukimorele ikharari.”

²³⁶ Vakhumaly’aka mwa yeeyo, khurowa khukilaathi. Miyo khwira, “Ehaali anyu, muhano?”

Owo khwira, “Oh, sayi.”

²³⁷ Nto miyo khwira, “Mukiswaamihe,” miyo khwira, “Miyo ka Reverendu Branham, murumeyi.”

Owo khwira, “Oh, mukiswaamihe. Mukiswaamihe, Reverendu Branham.”

²³⁸ Miyo khwira, “Muhano.” Miyo khimuleela ehantisi ene. Miyo khwira, “Miyo keemenle vale, ni kaamoolamulani, kuupuwelaka, ‘Etthu xeeni yootakhala!’ Alakela mookhalana aana.”

Owo khwira, “Kookhalana.”

²³⁹ Miyo khwira, “Exeeni evonyehale ephiro?” Owo khupacerya okileela wahala aarowa wiiniha murima wa khula mmosa. Miyo khwira, “Miyo—miyo kaamukoha Muluku mwaha wa xeeni Owo ahaalakaseih’awe etthu ene eyo mulaponi. Va, nyuwo va n’axilopwana ala anli anamuhapaliwa, ni nyuwo moohapaliwa, yeenyu.” Nto miyo khwira, “Nihiku nlo... Ephome ele enikhottiherya oviruwa wa Muluku woorweelani. Nyuwo munoorowa okhwa nihiku nlo. Vano, nto, nyuwo mwa—nyuwo mwa mutthu ootaphuwa vano, munooverya okhoota ahiiso waakhela.” Miyo khwira, “Masi nihiku nimosa munep’anyu onoorowa wu okina, weiwo ohikhanlewo omoreliwa ikharari ohanle. Nto nyuwo mwakhwa mutampini mwanyu, moolamuliwa, nto munrowa omooroni.”

²⁴⁰ Moosuwela? Muthiyan’ole oroovenya vakhaterani vale murestaurante mme. Naahikhalana muthukumano wa mavekelo muhinatoko anyu wiiwa mookhalaru, nto owo khurwa wa Kristu. Yaari exeeni iyo? Muhaalamule; mwaaleele Ehapari yooreera. Awo aroovariwa xetwani; awo atthu ankhwa mmukhaleloni mu. Awo anivariwa murima n’ile enikhuma nno. Ovariwa wahu murima onkhuma osulu. Nrowe noone ekhanly’ahu wiiraka ni italento sahu, wira naaruuhe akina wa Kristu.

²⁴¹ Tith’ihu a Wirimu, ninnooxukhuruni mwaha w’oreera Wanyu murima ni omoriwa ikharari. Mukilevelele, Pwiya; khino, athu, nkireere waapisiha va. Masi okhalaka omaliha

wa mithukumano iya s'oxekuwa ntoko ola, miyo kaatthunne waaleela “axetwani,” ni nkireere okhomakela yeeyo nipuro nimosa, mwa elaleeryo emosa, masi khino anoowerya wiiwa saana, nno ni iwe, ni wiiwa saana etthu ehimaly'aka. Nyuwo munnisuwela entthuna murim'aka, w'oruuha yeeyo.

²⁴² Wira atthu ekhume va voosiis'ula, ni alopwana n'athiyana ewehaxaxeke khula mweetelo arin'aya, masi ekhaleke ootteeleliwa murima ni ootaphuwa. Esuwele wira Muluku oowoopola. Ni wira enweheke Yoowo, eliyale ismu saya sothene ni itthu sinaarukurerya, ni ekhaleke ni murettele ni woviisumaaliha, ni omoova Muluku. Vano nto, Muluku, Nyuwo mwatthuna waarumeela etthu p'itthu, Nyuwo munoowerya olavula ni yaawo ene ni waaruma vatthu ti vatthu Nyuwo muntthun'anyu wira erowe wala khula etthu Nyuwo muntthun'anyu wira yiire. Atthu ekhale oowiiyeviha ni emphwanye Kristu mmurimani mwaya. Munilevelele, Pwiya, soovonya sahu, khula mmosa a hiyo.

²⁴³ Ni noosuwela wira—wira Satana orookhuma ntoko kharamu onoopa mirukulu, mapuro othene, amukhuuraka ole onimutthun'awe, awaraka ikhasako s'etiini. O Muluku, aan'ala oowooniha othunku, nkaaweheni, mapuro othene. Awo t'otthukuwa ni owoonihereya w'atthu. Nto kinoovekelani Nyuwo, Muluku, wira mwaamorele ikharari, ni nwoopole othene arimenle, mwaavonihe aretta. Ni, Muluku, hiyo ninnisuwela wira axetwani ala aalupale a iretta anaarweela an'Inyu, wira Nyuwo mookhalana eliveryo emphwanyaneya iwe, wira ekhapelele yeeyo. Ni axetwani othene anaatthehiha, Nyuwo mookhalana eliveryo emphwanyaneya iwe, enookhapelele yeeyo. Ni kinvekela wira Nyuwo munivahe mwa Nsina na Yesu. Amen.

Kaatthuna kisuwele sinto yoo . . .



OXUTTA S'AXETWANI — MUKHALELO WA ETIINI EMK53-0609A
(Demonology – Religious Realm)

ETTHARANELO YA OXUTTA S'AXETWANI

Mutthak'ola wa Munna William Marrion Branham, opaceryawene olaleeriwe ni Enkelesi Namanli oxekuwa, mahiku yeettaka 9 mweeri wa Junho, 1953, wAnfiteyaaturu Roberts Park oConnersville, Indiana, wAmerika, okuxiwe wo okaravariwa mufitani ya makineti khulempwa wothene ni nntaava n'Enkelesi. Otaphuleliwa nno mw'Emakhuwani okhumiheriwe ni okaiwe ni Voice Of God Recordings.

EMAKHUWA

©2020 VGR, ALL RIGHTS RESERVED

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org

Copyright notice

All rights reserved. This book may be printed on a home printer for personal use or to be given out, free of charge, as a tool to spread the Gospel of Jesus Christ. This book cannot be sold, reproduced on a large scale, posted on a website, stored in a retrieval system, translated into other languages, or used for soliciting funds without the express written permission of Voice Of God Recordings®.

For more information or for other available material, please contact:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org